

## *ASO LUA, 12 MATI 2024*

*Na nofoia e le Fofoga Fetalai le Nofoa i le 9.36 i le taeao.*

Tatalo.

**FOFOGA FETALAI:** Ou te faasilasila atu ua amatalia nei Taualumaga a le Fono Aoao Faitulafono.

Ou te muai faafeiloai atu i lenei taeao i le paia o le Palemene, i le afio o lau Afioga i le Tamaitai Palemia, afio lau Afioga i le Sui Palemia, afifio a outou Afioga i Minisita o le Kapeneta faapea foi a outou Afioga i Minisita Lagolago. Afio lau Afioga i le Taitai o le Itu Agai aemaise o sui usufono mamalu uma o le tatou Palemene.

O paia lava o Samoa ua taoto a o se alaoo, o sa foi ma faiga e le avea e oo lava i le faavavau, taoto atu ia i le fatuaiga tausii a Tumua ma Pule. Ae i le tulaga aloaia ou te faatalofa atu ai i lenei aso fou, ua o tatou molimauina le matagofie o le Atua i lenei taeao. O lo o tumau pea lona alofa i le soifua mo le tatou ola valauina. Malo le soifua manuia ma le lagi e mama.

Le afifio mai o Ofisa Sili o Pulega o Matagaluega ma Faalapotopotoga Tumaoti a le tatou Malo, taeao manuia, malo le usu i lenei taeao.

Samoa i ou tulaga faalupelupeina i lau faafofoga tapuai mai i so o se tafa o le atunuu ma le lalolagi atoa, e faatalofa atu lau Palemene i lenei taeao fou. Malo le soifua manuia ma le lagi e mama. Tapuai maia ma le manuia.

Le alofaiva o le tatou Maota i lenei aso ia i ai le agalelei o le Alii. Manuia le usugafono a lau Afioga i le Taitai o le Malo ma lau Kapeneta, manuia foi usugafono a itumalo taitasi, manuia foi le tapuai mai a Samoa.

## **ILOILOGA O LIPOTI A KOMITI FAA-PALEMENE MA TALI A LE MALO**

**FOFOGA FETALAI:** E mo le lelei faagasolo o le iloiloga o Lipoti a Komiti Faa-Palemene ma Tali a le Malo, ua faatulaga le faagasologa o galuega o le aso i se faiga talafeagai, e mafai ai ona tasi le taimi e tali ai le Minisita e fai ma sui o le Malo i mataupu e fitoitonu ma ia.

O se faatulagaga e sologa ai le tatou galuega ma faasaoina ai le taimi i le fefoifoi o iloiloga o Lipoti e fitoitonu ma se Matagaluega po o se Faalapotopotoga e tasi.

E i ai le talitonuga e fesootai auaunaga ma tiute tauave uma o Matagaluega ma Faalapotopotoga o lo o i lalo o le vaavaaiga a Afioga i Minisita taitasi. E lelei foi la ona iloilo faatasi uma Lipoti e fitoitonu ma le Minisita ina ia tasi ai le taimi e tali ai mataupu uma o le a sausaunoa i ai le paia o le Palemene.

Ua maea ona faasilasila i le aso fono talu ai le taunuuga o le soalaupulega a le Komisi Faa-Palemene ma o le a faapena ona limataitaiina ai le tatou iloiloga.

Ae avea lenei taimi e momoli ai le faafetai tele a le Nofoa i toe Ulutaia o le Maota, lau Afioga i le Tamaitai Palemia faapea foi lau Afioga i le Taitai o le Itu Agai ona o se feiloaiga ma se faatalatalanoaga aua lava le sologa lelei o le faatinoga o le tatou galuega i le aso aemaise lava o le tauaoina o tatou Lipoti nei e 34, ma o se fuafuaga atamai tele le fuafuaga lea ua fuafua ina ia faataua galuega a Komiti taitasi aemaise foi o Lipoti o lo o ua faataatia i luga o le Laulau-a-Fono ina ia faafaigofie ai foi ia iloiloga a sui usufono mamalu.

O le mea lea faafetai mo le fesoasoani mai o lea ua faataatia ai le tatou galuega i se auala talafeagai ma se auala atamai ma le talitonuga ua lava ma totoe taimi na silasila totoa i ai a outou Afioga i a tatou Lipoti. E pei ona i ai le fuafuaga ma ua i ai le faatatauga o le a le toe laulauina Lipoti taitasi pei ona masani ai Taitaifono e faapea foi i Tali a le tatou Malo o le a le toe laulauina. E i ai le talitonuga ua maea ona faitau e le mamalu o le Palemene ma ua malamalama atoatoa i ai a outou Afioga.

O le agaga lena e momoli atu ai le agaga faafetai i toe Ulutaia foi o le Palemene ma le fesoasoani mai lea ua faafaigofie ai le tatou galuega.

**1. P.P. 2022/2023 NU.119, LIPOTI A LE KOMITI O LE VAEGA O ATINAE ESEESE I LE P.P.2021/2022 NU.3, LIPOTI FAALETAUSAGA A LE MATAGALUEGA O PUNAOA FAALENATURA MA LE SIOSIOMAGA MO LE TAUSAGA FAALETUPE 2019/2020 - ILOILOGA**

**1.1. P.P.2023/2024 NU.19, TALIA LE MALO I LE P.P.2022/2023 NU.119, LIPOTI A LE KOMITI O LE VAEGA O ATINAE ESEESE I LE P.P.2021/2022 NU.3, LIPOTI FAALETAUSAGA A LE MATAGALUEGA O PUNAOA FAALENATURA MA LE SIOSIOMAGA MO LE TAUSAGA FAALETUPE 2019/2020 – felafolafoaiga tolopo mai le aso fono 16 Iuni 2023**

**FOFOGA FETALAI:** E tolopo felafolafoaiga i le aso fono 16 Iuni 2023 o lo o saunoa le sui usufono mo Aleipata Itupa i Luga.

O le mea lea ou te tapa lau Afioga i le sui usufono mamalu mo le faaauauina o lau saunoaga, lau Afioga i le sui usufono mamalu.

**Afioga FUAAVA SULUIMALO AMATAGA (Aleipata Itupa i Luga):** E talitonu ua maea ona saunoa lau Afioga i le Fofoga Fetalai e

fai ma ositaulaga i lenei taeao faapea ona sii le viiga ma le faafetai i le tatou Tapaau i le lagi, ua faapea ona taitai manuia mai lou soifua aemaise o le mamalu o lenei Maota i taeao manuia. Ou te iloa o le tatou taulaga lava lea e faapena ona tatou faatauana i le taitoaluaina o i tatou e le agaga o le Atua ina ia faataunuuna ma foai mai ni mafauauga lelei e fatufatu ai lo tatou Malo aemaise o Lipoti Faaletausaga a Matagaluega ma Faalapotopotoga lea o le a lauliliuina foi i lenei taeao.

O se avanoa foi e faatalofa aloaia atu ai i le Maota nei i le afio o lau Afioga i le Fofoga Fetalai aemaise foi o le Tamaitai Palemia ma le vasega a le Kapeneta i alii ma tamaitai Minisita, o Minisita Lagolago aemaise foi o le Taitai o lenei Itu Agai ma le mamalu o alii ma tamaitai sui usufono.

Ua faafofoga Samoa o lea ua e saunoa ma faafeiloai le mamalu o Samoa ia e talitonu o le a le toe i ai se faamatalaga ae o le a aveaveloa se taumafaiga e tusa ai foi ma le Lipoti a le Matagaluega o Punaoa Faalenatura ma le Siosiomaga lea ua i lumamea nei.

Lau Afioga i le maitau atu i le Lipoti a le Komiti o Atinae Tetele ia pei o le vaega lava lea e aumai ai a latou fautuaga. E tolu lava fautuaga taua lea e aumai.

A o le fautuaga muamua ia pei e faapea e tuufaatasia le vaega lea o le malosiaga faafouina o lo o i totonu o le Matagaluega lenei ma le vaega lea o le EPC po o le Malosiaga Faa-letise.

O lea foi ua maitau atu i Tali a le Malo o lo o i ai lava tulaga e lagolagoina e lenei foi sui usufono ona e i ai le taua o mafuaaga pei ona aumai foi i le tali. O le lipoti lea o le 2019/2020 o lona uiga o se mea o le tolu i le fa tausaga talu ai. Ma o le taua o lea tulaga e tau ese le agaga o le Tulafono o le 2010 a le EPC po o le Malosiaga Faa-letise ma le Tulafono foi o lo o limataitaiina ai le Malosiaga lea Faafouina lea. E pei e tau agai le malosiaga faafouina i le tulaga lea, o le taumafaiga e faaitiitia aafiaga o le suiga o le tau i tulaga lea o kasa oona, greenhouse gas emission lea e puaiina ma faaleagaina ai le siosiomaga. Ona o le malosiaga faa-letise pei e agai le auga o le Tulafono o le avea lea o le auaunaga i le mamalu o le atunuu, le service ina ia tofutofusia. E tusa e fausia e latou e i ai le production, ia faapena foi ona auina atu i le mamalu o le atunuu, o le service la lea.

A o le vaega la lea a le malosiaga faafouina ia e pei e tau agai i faiga faavae e aiaia ai le atinaeina o malosiaga faafouina ina ia mautinoa e faaitiitia aafiaga i le siosiomaga e mafua mai i kasa oona lea o lo o aafia ai le afuafu o le osone. Ia aemaise lava le tele o tulaga e aafia ai le tatou siosiomaga.

O le faataitaiga o le tulaga lea o tatou afi, afi ia o le suauu ma le kiso ma tulaga uma faapea. O lea ua i ai le tapenaga sa taatia ai foi i le faigamalo talu ai, o le a taumafai e tulei le tatou renewable energy, le latou pasene lea e maua mai i malosiaga faafouina. renewable energies lea iai ia afi vai po o hydropower lea e i ai le la, lea foi e i ai le savili,

tatou solar system ia aemaise foi o tatou wind turbines. O lo o tele lava nisi fuafuaga.

O lea foi ua i ai le vaega o bio-gas po o le vaega lea e maua mai i tulaga o le otaota, ia ma le faapalaina o laulau ma tulaga uma faapea e maua ai foi le bio-gas. E le o i ai la se tulaga tele i le bio-gas o i ai i le taimi lenei. O lau iloa pei lava o Piu i Falealili le plant feoloolo la e i ai nei, ae o lo o mafai ona maua mai le kesi e fai ai le kuka i fagu kesi ma tulaga uma faapena.

Ae o le tulaga i le eletise ia pei o le la, o le vai ia ma le savili lea i ai le taimi nei, lea ua tele ina faaaogaina. O lo o i ai foi la le tulaga e tatau ai ona tele le... ona e faaitiitia ai le aafia o le siosiomaga. O le la latou, ia o le natura lava lea o le siosiomaga e le o toe i ai nisi kasa oona e mafai ona toe maua mai na o le faaaogaina lava o le vevela ma le malosiaga o le la e maua ai le tatou eletise.

E pei o si eseese lea o le tulaga lea. Ou te lagolagoina ai le tulaga lea e faatumauiina pea le malosiaga faafouina i le mea o lo o i ai nei i le Matagaluega lea o Punaoa Faalenatura ma le Siosiomaga. Ae o ona mafuaaga na, o latou e tapenaina Faiga Faavae ina ia sosolo i ai ma o lea foi la sa i ai le tatou target lea sa tulituli, pei lava o se vaimea o le 2030, e fua atu ai pe ua oo i le 100% le tatou renewable energy. Ia a o le taimi nei, pei lava sa oo tatou i le 60% a o lea e aumai Lipoti talu ai nei o lea ua toe pau i lalo i le 32%.

E i ai mafuaaga ou te talitonu e mafua mai tulaga nei, ua tele le demand, ua tele mea e manaomia ai le malosiaga faa-eletise, ae ua leai se tatou atinae, ua le toe i ai nisi tatou hydropower ma nisi tatou solar farms ua toe atinae, o lona uiga o lea ua gata lava tatou i i ae ua a'ea'e lava i luga le manaomia o le eletise i le atinaeina o le tamaoaiga o si o tatou atunuu i tulaga eseese. Ma o le tulaga lea, e tatau lava ona taumafai ia tulei faatasi ia alu i luga le manaomia, a o lo o alu foi i luga le fausia o tatou malosiaga nei. O lou iloa e tele isi avenues po o nisi tulaga e mafai ai ona faateleina tatou solars, ou te iloa foi e tatau ona toe faaopoopo nisi tatou wind turbines e faaoga ai le savili, aua o la e ua amata mai tua i Aleipata i si ou itumalo.

Ae afai e toe avatu nisi pe'ape'a, e faapena ona... a lelei lava, ona ola ai lava lea o si o matou pito i le itu i sasae, sau lava i Lotofaga seia tau mai Fagaloa, ia ola ai i o aua o la e foi e i o le hydropower tele lava lea e i Afulilo. E pei e foliga mai e tamaoaiga le itu lea i sasae o le tatou motu nei i Upolu e maua ai le malosiaga faafouina lea. Afai ae faaauau fuafuaga sa i ai i le faigamalo talu ai e alu i luga tatou afi pe'ape'a ia savili ae sosolo atu i lalo tatou solar farm, ia e tasi lava le eleele e faaoga ai ae taufai produce uma mai le malosiaga lenei. O lo o maua ai i ina le la toe maua ai ma le savili, e le pei o isi itu ua tele le eleele e taatia ai, ia ua na o solar panels aua le malosiaga faafouina mai le la, ae pei o se itu lea e faauala atu ai foi se talosaga a lenei itumalo, afai e faaauau fuafuaga sa faataatitia i na tausaga, ia o faatasi le savili, maua ai le power,

le malosiaga faafouina ia ma le la i le eleele lava e tasi. Na ona faataatia atu i ina ma le agaga faaaloalo.

O le isi tulaga i Tali ia a le Malo e aumai, e taua le galuega a le malosiaga faafouina, o lo o i ai le tatou... e i ai le Parish Agreement, lea e i ai tulaga foi ia sa saina ai le tatou Malo, o lo o i ai tulaga o contribution lava ia a Samoa lea e tau o le NDC po o le Nationally Determine Contributions, o mea la ia o a tatou lava atinae e fuafuaina ia faaitiitia ai aafiaga o le suiga o le tau. O lo o i ai foi isi vaega mo mitigations lea e tau o le NAMA po o le National Adaptation and Mitigation Actions, o galuega ma atinae ma tapenaga uma ia a si o tatou atunuu ina ia mautinoa, a i ai suiga o le tau, e mafai ona adapt, e mafai lava ona toe mitigate e tatou.

E tusa lava po o a aafiaga, a o la e... tama foi lea pei e le fiu, pei foi lele e sau lava a o la e ua tatou tapena ua sau lava ma fiki foi lele ua tapenapena tatou i le tulaga lea. Ma o mea uma la nei, a lelei ona tatou tapena faatasi i ai le tatou faigamalo ma le tatou atunuu, ou te iloa foi o le a feoloolo se seleni e sasaa mai i faalapotopotoga nei, le UNFCCC po o le convention lea o le climate change lea ua faapena ona establish ai ma fausia nisi o Faalapotopotoga lea sa amata i le GEF po o le Global Environment Fund, sa tele ina sau ai le fia miliona ia Samoa.

O lea la ua uma le tulaga lea, fai le Parish Agreement ua i ai foi ma le GCF po o le Global Climate Fund, ou te iloa o lea na maua mai ai le... ou te maitaua a o Minisita le Afioga i le Tamaitai Palemia le Afioga ia Fiamie i le Matagaluega lea i le 2016 i le faaiuga, sa usuia mai ai le fono a le Board, faatoa fai lava lea i inei i le Pasefika o le fono lea a o Minisita le Afioga ia Fiamie, lea sa talia ai le talosaga a Samoa. Ua ou iloa po o se vaimeia o le \$67 miliona Amerika. Ou te iloa o tapenaga ia sa agai i ai ma agai i le faiga o Vaisigano. O lau iloa o le fund lea lea e i ai uma tatou sailini lea ua faatu i Vaisigano, lea ua i ai foi le wall lea ua fai i Vaisigano, aua o adaptations ia ma mitigations nei e fau i seleni nei, ina ia mafai ona faaitiitia aafiaga o le suiga o le tau i le mamalu o si o tatou atunuu. Tou te silafia o le 2012 na aafia tele ai le...

**FOFOGA FETALAI:** Toe tasi le minute o le saunoaga a le sui usufono.

**Afioga FUAAVA SULUIMALO AMATAGA:** Le tatou taulaga i le afa lea o Eveni, lea sa lolovaia atoa ai le taulaga, aafia uma alalaupapa ma mea faapena, sa faapea foi ona to'a ai le atinaega o le tatou tamaoaiga. Ma o le taua la o le role lea a le Matagaluega o Punaoa Faalenatura ma le Siosiomaga, e i ai i totonu ma le vaega lea o malosiaga faafouina ina ia taumafai e faatino a tatou... aua a tatou faatino atinae nei, e sasaa mai foi le tamaoaiga o le lalolagi. Ma o le tasi lena o fuafuaga sa faatino i lena taimi, ae ou te iloa atonu o lo o galulue foi e faaauau, e le iloa po o lena tausaga ua toe sau se isi \$100 miliona Amerika e faaauau ai le faaleleia o tatou atinae tetele ia.

Ia, o isi tulaga i le Tali a le Malo e tusa ai foi ma le Lipoti a le Komiti, ou te iloa o lena ua tele ina aafia atu i ina i se faamatalaga, ae na o se taumafaiga vaivai lea a lenei itumalo e avatu ai se faamatalaga e lagolago ai le tulaga lea o le i ai pea o le renewable energy po o le malosiaga faafouina, i lalo o le taitaiga a le tatou... ona o le tele o lona core functions e agai i ina i le siosiomaga, faaleleia le siosiomaga, puipuia kasa oona, aemaise ai e fausia mai ai foi isi malosiaga faaeletise mai le siosiomaga lava ia.

Ae o le a taatia tatou suauu ma kiso ma mea faapena ua tele ina faaleagaina ai le tatou siosiomaga, aemaise foi o le tapenaga ina ia lava le tatou carbon storage, lea e i ai le carbon sink, aua e ese lava le carbon emission. A tele le tatou carbon sink po o le carbon storage, ou te iloa o le a taua ai le tatou carbon credit lea sa taua foi i nisi fonotaga. A tele le tatou carbon storage, o lona uiga o se taimi o i luma ona tatou agai loa lea i le carbon credit, faatau le tatou credit lena i isi atunuu la e tele a latou emission. Ae a faaitiitia le tatou emission ua tele lava la le eseesea lea e maua ai le tatou credit ona tatou o loa lea e faatau maua mai ai nisi tatou tupe e atiae ai le tatou atunuu.

**FOFOGA FETALAI:** Faamaea mai le saunoaga a le sui usufono mamalu.

**Afioga FUAAVA SULUIMALO AMATAGA:** Ia, lau Afioga ua e faamaea atu ai se faamatalaga a lenei itumalo. E momoli atu ai le agaga faafetai i lau Afioga mo le avanoa, aemaise foi le faafofogaaga a Samoa, aemaise si ou itumalo o Aleipata Itupa i Luga. Ia, o si o tatou faatauvaa lena o lea ua faaleo, atonu o se taimi o i luma a liuliu le tofapoto ma le tofamamao a le Malo ia faaauau atu nisi o atinae o lea sa taumafai e faatuina i totonu o si o tatou itumalo, toe faatele nisi o pe'ape'a e maua mai ai le malosiaga faafouina mai le savili, aua leaga o tatou o le matamatagi, aemaise foi e faaoga lava le eleele lea e tasi e faatutu ai nisi o solar ina ia faapena ona maua ai foi le malosiaga faafouina mai le la, e faaopoopo ai ma le hydro la e i o tatou tuamaota, ona faapena lea ona tele lava lea o le tatou malosiaga faafouina e atinae mo le tatou itumalo. Ma le agaga faaaloalo faafetai.

**FOFOGA FETALAI:** Malo faafetai. Malo saunoa. Ou te faamalulu atu i le Maota, o lea faatoa logo mai le Nofoa o lo o i ai le faaletonu o tatou fesootaiga i fafo. Ua i ai le agaga o le Nofoa o le a faataatiaese tatou galuega mo ni nai minute se i tau togafiti le tulaga lea ona tatou toe faaauau ai lea o le tatou galuega.

E faataatiaese tatou Galuega mo se taimi laitiiti se i tau saili le faafitauli.

*Na faataatiaese Galuega a le Fono Aoaofaitulafono mo se taimi laitiiti ona o le faaletonu o fesootaiga i fafo i le itula e 9:59 ma toe faaauau i le itula e 11:04 i le taeao.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoaofaitulafono.

Ou te faamalulu atu i le Palemene ona o le tulaga faaletonu ua tulai mai i le tatou fesootaiga mo le faasalalauga tuusao o le fono i luga o le facebook. O lo o sologa lelei le faasalalauga seiavagana ai le leo e le o mafai ona maua mai e nai o tatou tagata. Ae mo le silafia foi, o le toatele o nai o tatou tagata o le facebook o lo o maimoa ma faalogologo mai ai i le fono. E i ai foi le naunautaiga ia maua pea e tagata lautele uma le avanoa e faafofoga ai i tonufai a le atunuu e ala i felafolafoaiga ma faaiuga e taunuu i ai le tatou Maota. O ala foi o faasalalauga i le facebook ua aiaia i Tulafono Tumau, o se tasi o ala o faasalalauga e faasalalau ai le fono a le Palemene o lea ua toe faaleleia. Ia, e momoli atu ai le faafetai ma le faamalo i lo outou onosai.

E faataatiaese a tatou Taulumaga ua maea le saunoaga a le sui usufono mo Aleipata itupa i luga. O le a lafo atu ai le avanoa nei i le Taitaifono o le Komiti o Vaega o Atinae Eseeese e te talifuaitau i mataupu sa laga e le tatou Maota ona sosoo ai lea ma le talifuaitau a le Afioga i le Minisita.

Tulai mai lau Afioga i le Taitaifono.

**Tofa Lealailepule Rimoni Aiafi. (Faleata 3):** Lau Afioga i le Fofoga o le Fono...

**FOFOGA FETALAI:** Se i... malie lau Afioga i le Taitaifono se i tulai mai le sui usufono mo Faleata 3.

**Tofa Lealailepule Rimoni Aiafi:** Ia faafetai lava i lau Afioga. Ia, e le... o le finagalo o lau Afioga e tutasi. Pau lea sa i ai le manatu ona ma te le i fono i le fonotaga lea na talanoaina ai le Lipoti lea. Na o nai mea laiti lava ia ae afai e leai se avanoa, ia e le afaina. Ma le faaaloalo lava.

**FOFOGA FETALAI:** Ia, o lea e maitau atu ua see atu le sa i le Taitaifono. Ia ae i ai foi le manatu i se isi itu ona o lea foi ua faatu mai le manaoga o le sui usufono mamalu. Ia o le a tuu atu le avanoa i lau Afioga i le sui usufono mamalu ona tuu atu loa lea i le Taitaifono.

**Tofa Lealailepule Rimoni Aiafi:** Faafetai i lau Afioga...

**Afioga Fuaava Suluimalo Amataga:** Lau Afioga i le Fofoga Fetalai faamolemole...

**FOFOGA FETALAI:** Ia, malie le sui usufono mamalu se i saunoa mai lau Afioga i le sui usufono mamalu o Aleipata Itupa i Luga.

**Afioga Fuaava Suluimalo Amataga:** Faafetai. Ona o lea ua fai lau faaiuga o le a faaauau le tatou fonotaga. Ia ona o lea e maua atu sa e saunoa e le o maua le leo, pe mafai ona toe faaleo atu le lauga a lenei itumalo ia maua lelei le leo ne i te i ua matamata mai na o ata ona faapea ai e gugu le sui usufono o le itumalo se i faafofoga mai si o matou itumalo i le lauga e faaleo atu. Ma le agaga faaaloalo.

**FOFOGA FETALAI:** Ia, e sao le sui usufono ae aua e te popole ua uma ona faamau uma lau saunoaga. E toe faasalalau atu lava i se taimi ona e le mafai foi ona tatou toe foi i tua le tatou galuega, a o lea e faamau. E faapena lava uiga o le tatou fono e faamau uma lava...

**Afioga Fuaava Suluimalo Amataga:** Ia faafetai. Ia, o au e tumu i le faaaloalo. Faafetai pe a ua maua lelei le leo faamolemole lau Susuga i le Failautusi.

**FOFOGA FETALAI:** Ia faafetai. Ia, tulai mai le sui usufono mo Faleata 3.

**Tofa LEALAILEPULE RIMONI AIAFI:** E momoli atu le faafetai tele i lau Afioga mo le avanoa. Faafetai tele i le toe tuuina mai o le avanoa, o le a faapuupuui foi. Pau lava lea lau Afioga, mo le silafia e le atunuu aemaise i latou o lo o alaala i fafo, i le taimi lea sa ou i ai i Niu Sila ia Ianuari, sa ou faalogologo mai i le 2AP ne i te i ua faapea e le ola i Niu Sila ma le tele o atunuu o le lalolagi. E i ai le mea e tau o le Zeno App e te alu ai i luga ona download lea o le tatou 2AP e ola lava i so o se mea o le lalolagi. Leai, na o le faaali atu i lau Afioga ne i te i ua toe pe i le lumanai ae o le tatou 2AP ua ola i le lalolagi atoa. Ma le faaaloalo lava ae faafetai mo le avanoa.

O nai vaega ia lau Afioga i le Lipoti, faafetai lava i le Taitaifono ma le Komiti i le Lipoti tuuina mai ae toe faafesili lava i nai vaega ia faamolemole, ona e maitau e toetiiti a \$2 miliona tala le tupe lea e le i faaaogaina i tausaga ia e lua. E talitonu lea sa i ai le Koviti a o lau vaai ua tele tele lea tupe na totoe. Pe aisea le tulaga lea ua... na mafua ai le tele tele o le tupe ua le faaaogaina.

Ona oo mai lea i le Green Climate Fund lea e taua a o le vaitaimi lea sa faatalanoaina ai le tatou alavai tele foi lea i Alaoa. Ia, e faafesili atu i lau Afioga i le Taitaifono pe na toe fesiligia po o le a le tulaga ua i ai lea atinae tele a le tatou Malo i lona toe faaauauina.

Ona fia fai lea o se manatu i le mea lea na saunoa ai le... le Fautuaga a le Komiti e tuufaatasia i le... se avanoa e faapea e tagai ai le Malo i le tuuina mai e le Renewable Energy Division i lalo o le EPC. Lau Afioga, o se manulauti ua leva ona tapena le Malo talu ai e talitonu o le finagalo



foi lea o le Malo o i ai nei ina ia faatupulaia le faaaogaina o renewable energies ia. O mea ia mo le faaaogaina i le eletise. Peitai ane o le mea lea e maitau o le tele o mau suesuega ma le tele o tagata ua omai i le mea lea, o lea la ou te fia fesili, po o ai tonu e o i ai e aumai le faatagaga, faatagaga e fai ai. O lea tatou te malamalama i mea o le suavai ma le la ma le savili o mea taua ia a tatou... ua proven. Afai o lea ua uma ona fai suesuega ma mautinoa e tele le aoga ma e tele foi i Samoa.

A o isi la mea ia lea tatou te vaavaai atu nei i ai, o lea e tele na aumai ma maumau ai le tupe ma le taimi ae uma ae e le mafai e leai se sustainability e le mafai ona faaauau ai pea. O le mea la lea lea ou te fesiligia ai le tulaga lea pe afai foi la e tuu mai... aua o lea tatou te iloa o mea tau policy... o mea tau.. taiala, faatonutonu lea i lalo o le Matagaluega o Siosiomaga. Ae o le tulaga lea, lea ua tau vaai ua leva ona finau mai isi tagata i le mea o le pa'u foi lea se i tulou, le pau taavale. O isi o le mea o le vao foi lea e aumai e toto. O isi lea na fai e le Esetete Tausi le mea o le bio-mass e faaoga ai laau foi ia. E alu atu nei le asiagiaga a le Komiti o Tupe ua le toe faaauauina. A o lea e aumai i le Lipoti e tele le aoga i le Esetete Tausi ae po o a la mafuaaga o mea nei.

O le popolega lea e i ai o le omai o i latou ma lea metotia po o le aikia fou ia o le vaega lea suesue. A avatu foi la i o le EPC e le iloa pe faafefea ona... le fesootaiga lea. A alu foi la malaga i fafo i lou talitonuga e tele ina o ai le MNRE ae le o le EPC. Ia, na o nai vaega ia se i tagai i ai lau Afioga... E lelei le fetuunaiga lea e i ai nei. Manatua foi... aua e lua mea na tuu i ai, po o i lalo le EPC po o lalo o le MWTI i mea tau regulations aua o i latou lea pei e vaaia le mea o le vai ma isi tulaga faapena.

O le isi vaega lau Afioga i le Minisita sa i ai le finagalo o le Malo talu ai ina ia faatuina se Matagaluega lea o le Climate Change, le siosiomaga, ona ua pei ua lautele tele galuega ua feagai ma le MNRE. O lea ua i ai... out e talitonu lea ua i ai le Division fou lea o le Climate Change i lalo o lau Matagaluega. Ou te talitonu foi o le tele o malaga e malaga ai le Matagaluega a le Afioga i le Minisita o le MNRE po o le 80% o mea tau climate, o le tau. Pei o le ala lea sa tagai i ai le Malo talu ai i se tulaga faapea. Po o fea ua agai i ai po o le a foi se finagalo o le Malo i lea tulaga.

O le Lipoti lea, lea e aumai ai ma le Tulafono foi lea o le Pesticides. O le tasi lea o Matagaluega lea... o le Tulafono o loo faafoe e lau Matagaluega. O le vaiaso na tea nei lea na tatou vaavaai ai i le tulaga lea o le vailaau fagavao lea o le paraquat, o lea ua aumai ia faamaoniga e tele ai le aafiaga o le suavai, o le vai, o le ea i le vailaau lea ma e tele ni atunuu ua le toe faaaogaina ai. O lea la e fia maua ona o lau Afioga ma le Matagaluega lea e i ai tonu i lalo vailaau ia po o le a se finagalo o i ai a le tou Matagaluega i lea vailaau, pe le i ono faia se ban aua o lea ua faasa e Fiti i le 2020 lea na taofi ai e Fiti le vailaau lea. O la e i ai options, o la e i ai vailaau alternatives e mafai ona faaaogaina ae aoga foi e feutagai ai ma le Minisita o Faatoaga ma le latou foi Matagaluega, pei o latou lea e aumaia. Ae afai o lea ua i ai faamaumauga i le aafia o le

siosiomaga i le vailaau lea, e tatau ona fai i ai se finagalo o lau Afioga ma le Matagaluega.

Ia, na o nai vaega ia lau Afioga i le Fofoga o le Fono. Ia, e tele manatu ae talitonu ua lava ia mo lenei taimi ae faafetai tele lava mo le avanoa.

**FOFOGA FETALAI:** Faafetai. Malo faafetai saunoa. Ia tulai mai lau Afioga le Taitaifono, e talifuaitau i nisi o mataupu sa laga e sui usufono mamalu.

**Susuga Hon Tuilaepa Fatialofa Auelua Sailele Malielegaoi (Taitai o le Itu Agai):** Lau Afioga i le Fofoga Fetalai faamolemole...

**FOFOGA FETALAI:** Ia malie lau Afioga le Taitaifono se i tulai mai lau Afioga...

**Susuga Hon Tuilaepa Fatialofa Auelua Sailele Malielegaoi:** Ou te fesili atu a uma loa le saunoaga a le Taitaifono e le toe maua nisi avanoa?

**FOFOGA FETALAI:** Ia, o le finagalo lena o lau Afioga ma le Afioga i le Palemia i le tatou talanoaga.

**Susuga Hon Tuilaepa Fatialofa Auelua Sailele Malielegaoi:** Ia o lea la e fia fai ai sina manatu o a'u ae le i...

**FOFOGA FETALAI:** Ia malie lau Afioga i le Taitaifono se i tuu atu le avanoa i le Taitai o le Itu Agai ona tali mai loa lea...

**Susuga Hon TUILAEPA FATIALOFA AUUEUA SAILELE MALIELEGAOI:** Lau Afioga i le Fofoga Fetalai, ou te faamalo i le Komiti ma le latou Lipoti. O lau tilotilo atu i le Lipoti lenei, e lima tausaga lea e tuai mai ai. Na saina le Lipoti lenei ia Ianuari o le 2021. O le agaga o le Lipoti lenei ia vave ona oo mai i totonu o le Maota e vave iloa po o a luitau ona ave lea i le Komiti e vave aumai i totonu o le Maota ina ia vave fofo e le Malo o lo o tu lenei faletonu. O le auga atoa lena o le taua o le Lipoti lenei. Ae a lima tausaga faatoa oo mai se Lipoti e le aoga atoa le Lipoti mo le Malo o lo o tu aemaise o le tatou Maota nei e faavae ai le tulaga o le agai i luma po o le solo i tua o le tatou Malo. O le ala lea e taua tele ai ia te outou o Komiti ona faavavevave a outou galuega ma aumai Lipoti nei e soalaupule ai le Palemene.

O le tausaga e 1987, na ou manatua ai le fonotaga na faagasolo ona oo mai lea i le faaiuga, e 60 Lipoti o lea o le a tagofia loa e le Palemene. O le taimi lena e le avea i ni Komiti ae pigi mata lava i totonu o le Maota. Na o le tu ae lava o le Palemia faatu le lafo, o le 60 Lipoti ia e le i talanoaina, faatu le lafo e talia. Ona talia lava lea o Lipoti e aunoa ma se isi e malamalama i Lipoti ia. Mai le aso lena, ua le toe faamaoni foi Matagaluega latou e tusi sao Lipoti aua latou te iloa o a mea tusia na o le

aumai lava pasi e le malamalama. O le taua lena o galuega o outou Komiti. Ua matua leva tele lava, e lima tausaga o lea faatoa aumai le Lipoti lenei a le tou Komiti. Matua tou faiaga tele lava.

Lau Afioga i le Fofoga Fetalai, ou te tilotilo atu i le Lipoti lea o le 2019 ma le 2020, o le manaia ia o lau saini lea ou te saini ai. O si taimi puupuu lava lea ina ua see ese Fiamē ona ou tauavea lea o le Matagaluega. A o le mea ou te fiafia ai ou te alu atu i totonu e leai lava se mea o faaletonu. O la e lelei lava mea uma. Sa ou fia suea molimau ia sa ave ua faatau e le Malo lenei, lona uiga ua faatau e Fiamē faaleaganuu i Saina. E leai ma se mea faapena na tupu a o Lipoti na sa ave i fafo. O lea la ou te fiafia ai e leai lava se mea faapena o aumai i le Lipoti lenei, ma ou te talosia ia i latou o faia pea ia pepelo, aua nei tou toe faia ni tala faapena. E leai lava ma se mea faapena ma ua ou fiaifa foi ina ua tulai atu le Minisita o i ai nei ma ia toe faamauina le mau lea e leai lava se mea faapena na tupu, o le faatau i le Malo o Saina o ni fanua faaleaganuu. O le mea lena lea na ou manao ou te tulai atu ai...

**FOFOGA FETALAI:** Faafetai...

**Susuga Hon TUILAEP A FATIALOFA AU E L U A S A I L E L E M A L I E L E G A O I:** E oo foi la i le tulaga lea o le tapenaina o tatou fuafuaga mamao lea sa taua e le lauga a Aleipata Itupa i Luga, i le tulaga taua tele o le taumafai e faataoto a tatou taiala e mafai ai ona faatau le kasa kaponi. O lea ua ou tilotilo ua tau leai ni mea faapena o toe tupu i atunuu i fafo, a o le taua o le mea lenei, leaga o lea foi na fai ai le isi tuuaiga matuia na aumai se tupe tele ae le iloa po o fea le mea ua galoma i ai e atinae ai le mea lea.

Ia lea foi la ua tali le Minisita o i ai nei e leai lava ni mea faapena ua tupu ae ou te manao e faamama ia mea ae tatou agai i luma. Lau Afioga i le Fofoga Fetalai ou te toe faamalo atu i le tou Komiti ae aua ne i toe tuai ni tou Lipoti. Ia manuia le Fono.

**FOFOGA FETALAI:** Ia malo faafetai. Faamalo le saunoa. Ia o fautuaga lava ma timaiga mo le agai i luma o le tatou galuega, ae malo faafetai mo le fesoasoani ma le fautuaga. Ia tulai mai lau Afioga i le Taitaifono.

**Afioga FEPULEAI FAASAVALU FAIMATA SU'A (Taitaifono o le Komiti o le Vaega o Atinae Eseese):** E momoli le agaga faafetai i lau Afioga i le Fofoga Fetalai mo le tauavega o le tatou Fonotaga, o a foi ni faafitauli o tulaga tau fesootaiga o lenei aso, e i ai lava mea e tutupu i le ala ma le tatou savaliga. Faafetai foi i le tapuaiga a Samoa i le lavapapale aua le faagasologa o le fonotaga a lau Palemene.

E momoli le agaga faafetai e fai ai lou leo ma fofoga taumolimoli o la matou Komiti, o le Komiti o Atinae ma Galuega Eseese a le tatou Malo i le matou Komiti i lau Afioga i le Sui Taitaifono ma le Komiti mamalu.

Ia malo le tauavagameaina o le tatou Komiti mai lena tausaga e oo mai lenei tausaga ona o le iloiloina o Lipoti Faaletausaga a Matagaluega o fitoitonu ma tatou Komiti. Ae tapuai mai o le a taumafai se tatou tali e tusa ma mataupu na laga.

Lau Afioga le Fofoga Fetalai i le saunoaga a le sui usufono mamalu mai Aleipata Itupa i Luga e pei o le tele lava o lana saunoaga matagofie i le taimi ua sola, i le masina o Iuni ma lenei taeao, ia o le saunoaga faufautua ma le lagolagoina o le Lipoti, aemaise o Tali a le Malo. Faafetai i lau Afioga i le sui usufono mamalu e maitau foi ma maua e tele foi sou silafia i lea tulaga, ia ae faafetai foi le lagolago mai.

Ae o le tulaga e pei ona avatu ai le fautuaga a le Komiti i le Vaega 1 e tau tuufaatasi le Pulega a le Malosiaga Tau Eletise po o le EPC ma le vaega lea o le Malosiaga Faafouina, o le agaga o le Komiti ina ia mafai ona tuufaatasi i se Pulega e tasi, ina ia faigofie ai ona faatino galuega tau malosiaga e faaoga e le atunuu.

A o lea ua aumai le Tali a le Malo ia ua talia foi ma le agaga faafetai e lenei Komiti, ae mo le agai i luma ia toe silasila pea i ai mo nisi faiga e faafaigofie ai le faaitiitia o le faaaogaina o le kiso ma le suauu ae faatuputupulaia le maua o le tatou eletise e pei o le la ma le suavai aemasie foi o le savili.

O le saunoaga a le sui usufono mamalu o Faleata 3 o lo o fesiligia ai le galuega lea i Alaoa, o le Lipoti lea tatou te talanoaina o le 2019/2020. I le maitau foi a le Maota o le taimi lea o feagai tatou ma nisi foi o faamai i lena vaitau, e pei o le tulaga lena sa tau tuai teisi ai galuega a Matagaluega ona o le tulaga tau i le faamai sa poia ai le tatou atunuu.

O le vaega i le \$2 miliona e pei ona sa fesiligia e masalo o se taimi ona tali lea o le Afioga i le Minisita i lea vaega. Faafetai i lau Afioga i le Taitai o le Itu Agai mo lou finagalo e tusa ai ma nei Lipoti. O lea na ou vaavaai atu i le aso na saina ai le Lipoti e faasao lau saunoaga o le 12 Ianuari 2021, ae faatoa oo mai i o matou luma le Lipoti ma talanoaina i le aso 2 o Aokuso 2022. O lona uiga a manatu a'u nei o le Taitaifono ma le Komiti, e faamalulu atu i le Palemene ma lau Afioga i le Fofoga Fetalai, o le taimi lava na oo mai ai le Lipoti i o matou luma faatoa mafai ona matou talanoaina.

Ae a silasila i fatiatama'i sa tutupu mai ina ua maea le Faiga Palota e pei o i ina lea e tele ai a le va lea, ia ma faatuatuai ai galuega faa-Matagaluega e oo mai i galuega faa-Komiti. E pei o le tulaga lena na tuai mai ai ae le o faiga le Komiti tulou foi le Maota, o lo o sosolo lava le Komiti i Faiga Faavae ma le talanoaina o Lipoti ma tuuina atu i le Kapeneta aua lana Tali e tuuina mai.

O le tulaga foi i fanua faaleaganuu lea sa afea foi e le sui usufono mamalu e le o sau i le Lipoti ona o le Lipoti o tulaga tau le siosiomaga ae le o ni lipoti tau i fanua faatau. E pei o le faamalamalama lea ina ne i te i ua fesoloai fingalo ae faafetai mo fautuaga e taua foi mo Komiti ina ia faavavevave a tatou Lipoti. Ia pei o le tulaga lena e le o tuai le galuega a lenei Komiti ae o lo o fua lava i Lipoti e tuuina mai.

E pei na o le pau ia o nai vaega lau Afioga i le Fofoga Fetalai na afea foi i saunoaga e tusa ai ma le... faafetai atu ai...

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai na o le pau lea o se mea e fia faasao...

**FOFOGA FETALAI:** Ia malie lau Afioga i le Taitaifono se i tulai mai... Tulai mai lau Afioga i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** Ou te masalo e le o silafia e le Taitaifono o le Matagaluega lea, o lea foi e i ai ma tulaga o le faamauina o le faatau atu o fanua. O fanua umia saoloto ma so o se fanua lava e faatau o i e faamauina mea faapena.

**Afioga FEPULEAI FAASAVALU FAIMATA SU'A:** Ia faafetai, o lea la faatoa malamalama atu o fanua umia saoloto, ae le o ni fanua faaleaganuu e pei ona faamauina i lana saunoaga.

**Susuga Hon Tuilaepa Fatialofa Auelua Sailele Malielegaoi:** Lau Afioga le Fofoga Fetalai...

**FOFOGA FETALAI:** Tulai mai lau Afioga i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** E ala na ou fai atu leaga o ia le isi lea sa aofia i le talaiga lea, na faatau e le Vaega lenei fanua faale-atunuu e lavea ai foi ma fanua faaleaganuu e vaai totoa i ai le Matagaluega lea. Mo le silafia e le Taitaifono leaga o la na te le o silafia.

**FOFOGA FETALAI:** Ia ou te iloa o lea ua malamalama lea tulaga, e i ai se isi e toe tulai mai?

**Afioga Sulamanaia Fetaiai Tauiliili Tuivasa (Vaimauga 1):** Lau Afioga i le Fofoga Fetalai e fia faaopoopo ona o le matou Komiti... pe maua se avanoa

**FOFOGA FETALAI:** Ia se i saunoa mai Vaimauga 1.

**Afioga Sulamanaia Fetaiai Tauiliili Tuivasa:** E momoli le agaga faafetai i lenei taeao i lau Afioga i le Fofoga Fetalai. E maitau lava ma le totoa i le vaiaso ua tuanai, ia talofa e! O lenei foi ua amata lenei vaiaso fou, e momoli le agaga faafetai o lenei itumalo i le faafoefoeina o le sa o le atunuu. O lenei foi ua amata lenei vaiaso fou ia e faafoi le viiga i le Atua. Faafetai i le faauuga na e i lau Afioga lea e taitaiina ai lenei Maota. I lena foi tala na atoa i le Afioga i le Tamaitai Palemia ma Minisita ia malo le galulue mo le tatou valaauina.

I lenei foi itu i le Taitai o le Itu Agai ma le sui usufono mamalu. O le agaga e toe faalautele atu ona o le matou Komiti, le Komiti lenei. E momoli ai le agaga faafetai foi i le Minisita ua toe tofia foi le teine o le Vaimauga e avea ma CEO o le Matagaluega ia e momoli ai le agaga faafetai i lau Afioga i le Minisita.

Ae o le faaopoopo i tulaga ia o fanua faaleaganuu leaga o lea ua pei e tau tuuaiina le matou Komiti e leai ma se mea e aumaia i totonu o le Komiti pe a faapea o la e malupuipua i totonu o le 102. E le mafai ona faatau o nai mea ia o nai fautuaga ia e aumai e teuteu ai a o mea e faapena ona aumai laia e matou. E pei o le agaga lena leaga o lea tau tuuaiina le Komiti i le le aumaia o fanua faaleaganuu ma fanua faapena, o lea e malupuipua.

O le tulaga foi i le fautuaga a le Komiti e faalautele e taumafai ia tuufaatasi le EPC ma le Eletise lea mai le MNRE, ia faafetai i le tali malamalama a lau Afioga i le Minisita leaga o oe e iai lou tomai i le tulaga tau le mea lea o eletise mama.

E pei o le agaga sa i ai le Komiti ina ia mafai ona tasi lava se Matagaluega e faafoefoaina uma mea e maua ai le Eletise, ona o le popolega i le Lipoti foi na afifio atu ai le MNRE e uma loa le poloketi, o fea la e o ai le aufaigaluega? Aua pei e hire mai le aufaigaluega i le taimi e aumai ai tupe. Pei la o le agaga o le Komiti e o pea le MNRE e sue mai fund e aumai ai tulagaoa ma tupe e aumai ona faagaoioi loa lea ma ave ia i ai ni inisinia aua o lalo o Matagaluega o lo o i ai le EPC, o lo o i ai inisinia agavaa e faatinoina le tulaga lea.

Ae i le aumaiga o le tali a le Minisita, ua faamalieina foi lenei Komiti e leai, e le ninia fua le EPC ia o lo o maua le isi ma le tulaga i le eletise mama o lo o maua mai i le faalenatura. Manuia le fonotaga lau Afioga.

**FOFOGA FETALAI:** Faafetai malo le... faafetai mo le fesoasoani i la outou Komiti

**Afioga Masinalupe Makesi Masinalupe (Lefaga ma Faleaseela):** Lau Afioga i le Fofoga Fetalai...

**FOFOGA FETALAI:** Ia se i tulai mai lau Afioga i le sui usufono mo Lefaga ma Faleaseela.

**Afioga Masinalupe Makesi Masinalupe:** Faafetai mo le avanoa. Atonu o lea e tau maitau atu lava le tulaga e pei ona i ai lenei Komiti. Ae le matagofie foi i le faalogologo atu a lou sui usufono le tulaga e pei ona saunoa i ai le Taitai o le Itu Agai. E pei ua e faatonu mai le matou Komiti i le galulue ia vave ae mo le silafia, e le o sana matafaioi lea o le otegia o matou.

**FOFOGA FETALAI:** Malie lau Afioga i le sui usufono mamalu ia o fautuaga lava mo le agai i luma o tatou galuega, ae aoga foi e fesoasoani

mo le faalaeiauina atili o a outou Afioga i sui usufono mamalu aua lava le agai i luma o tatou Lipoti ina i ai le tulaga... Ia lea ua faamalieina foi le tulaga i le saunoaga a le Taitaifono ma sui o le tou Komiti i mafuaaga. O le mea lea faafetai mo le fesoasoani mai.

Tulai mai lau Afioga i le Minisita e talifuaitau i nisi o mataupu sa laga i Tali a le Malo.

**Afioga Hon TOEOLESULUSULU CEDRIC POSE SALESA SCHUSTER (Minisita mo Punaoa Faalenatura ma le Siosiomaga):**

Faafetai i lau Afioga i le Fofoga Fetalai mo le avanoa. Ona o lenei Lipoti na talanoaina muamua ia Iuni 2023 lea ua... o le tele o nisi o faamaumauga sa toe vaavaai ai i nisi o fautuaga sa tuu mai foi e sui usufono o le Palemene. Lau Afioga e pei lava ona tusa ai ma lenei taeao ia o le a taumafai e tali atu i ai i nisi foi o fautuaga.

O le a amata mai i le fautuaga a le Afioga i le sui usufono mamalu mai Aleipata i Luga. Atonu o le tele o le fautuaga ma le tuualalo e ogatasi ma le fautuaga lea na tuuina mai i Tali a le Malo i le vaega lea e le mafai ona tuu faatasi i le taimi nei le EPC ma le Renewable Energy Division, ona e i ai ia... e eseese a latou functions. O nisi foi o Poloketi po o vaega o lo o faapena ona saunoaina ia o lo o faapea ona silasila i ai le tatou Malo.

O le Vaega 1 e tusa ai o le Lipoti o le 2019/2020, i nisi Lipoti e sau i tua mai a le Matagaluega o lo o ua uma na tapena ai le tatou low emissions development plan. O le vaega lea na tapenaina e le Matagaluega e faasolo i ai o se faiga faavae e faaitiitia ai a tatou emissions, o lea la e lavea ai vaega ia o le faaitiitia o le eletise e maua mai le kiso ae promote ai a tatou renewable energy, e tai pei o vaega ia sa saunoa i ai e pei o le la, o le matagi o tatou wind turbines e le o ni windmill ma tatou vaega foi ia o wasted energy. O nisi foi o atinae sa tapena i lena foi vaiata e pei o le bio-mass lea foi sa taua o lea ua toe silasila i ai le tatou Faigamalo lau Afioga i le Fofoga Fetalai, ona e fai lava si gau o le tatou Malo i lea atinae e \$14 miliona na alu ai, ae tele ina gau o le tele foi o taimi e le o faaogaina. O lea la ua toe vaavaai i ai le tatou faigamalo ona o se atinae taua i auala e mafai ona maua mai ai le eletise ae atia'e ai le tatou atunuu ae aua ne i toe gau.

Lau Afioga i le Fofoga Fetalai o se isi vaega ona o faamaumauga a le tatou Maota nei i te i ua aveseina nisi o tatou faamaumauga, ona o lea na taua e le sui usufono le solar system. Lau Afioga i le Fofoga Fetalai, o le solar system o le vaega lea e i ai paneta o le lalolagi, o Venus o Pluto, ia e leai se fesoataiga o le solar system ma le solar farm. O le Malosi Faafouina e sau mai le la, o le solar farm ma solar power ia e i ai, ae leai se tatou vaega o le solar system atonu ua pau i le silasila a le sui usufono le eseese o vaega ia.

O vaega ia e promote e tatou o tatou solar farm o faatoaga foi ia e fai ai tatou... e pue ai le malosi mai le la. O le solar power la e maua mai i i, o lea e gaosi ai le eletise.

O le isi vaega lau Afioga na fesiligia foi e le sui usufono aemaise foi o le sui usufono mo Faleata, po o fea e ave i ai tapenaga nei o le tatou renewable energy. Ia atonu e silafia o lo o i ai le tatou National Coordinating Committee, o le vaega lea e i ai le Matagaluega o Tupe, o le Matagaluega o le Infrastructure MWTI, e i ai le EPC ma le MNRE. O le Komiti lea o latou o lo o iloilo ina uma vaega ona o le taimi nei e seei mai le tatou faigamalo o i ai nei, e tolu vaega lea e ave i ai vaega eeseese i le faatinona o tatou malosiaga. E le gata la o le Pamu Penisini a le Malo ma le faaaogaina o le tatou pricing o tatou penisini a o isi energy ia e alu ai le tatou EPC faapea foi ma le tatou renewable energy. O le vaega la lea latou te iloilo ina talosaga e tuuina mai ma fuafua i ai. Ma o lo o i ai foi fuafuaga a le tatou Malo ua uma ona faataoto i le tatou transition lea mai le tatou fuel i le tatou renewable energy e le gata la na o le eletise, ae o isi foi a tatou energy efficient appliances, o vaega uma e faaitiitia ai le tau o le eletise foi, a ia maua ai se tupe faasili a aiga, ae le gata i le o le faaitiitia o le tatou tali atu i le taugata o le tatou kiso lea e alu ai le tatou eletise.

E tusa ai o le vaega na saunoaina foi i le vaega lea o le silia ma le... toeitiiti atoa le \$2 miliona e le i faaaogaina e le Matagaluega. E talitonu lau Afioga o nisi o vaega o lo o aumai i le Lipoti ma faamalamalama ai foi, e le gata o le fesuiaiga o tagata faigaluega, o lea foi vaitau sa i ai konekarate e le i mafai ona faatinoina. O galuega tuua lava nei o lo o faapea ona ala ai ona tele se vaega o le seleni a le Matagaluega sa faataoto mai e le i mafai ona faaaogaina.

I le tulaga i Alaoa lau Afioga, e pei ona i ai o le Lipoti o le 2019 ua i ai nei le tausaga nei nisi o faataatiaga i le tapenaina o lea atinae. O le tulaga i le tatou pesticide lea na taua, o le Pesticide Board lea e Taitaifono ai le vaega a le Ofisa o Faatoaga, ae i ai sui o Matagaluega e galulue faatasi e silasila uma e le gata o paraquat ma isi vaega, ae o lo o iloilo uma vaega ia e ao ona aveesea aua ne i faatagaina mai totonu o le tatou atunuu. O nisi foi o vaega o pesticides ua uma ona aveese ae o lo o silasila foi i le i ai o tatou alternatives ina ia mafai a faapea ua tuueseina atu ma le tatou Tulafono, a ua i ai alternatives e mafai ona faaaogaina e tatou.

I le vaega na fesiligia i le tatou Climate Change, o lo o i ai le faamoemoe o le Matagaluega o lo o faamaea nei le tapenaga o le tatou Tulafono lea mo le Climate Change. O se faamoemoe i se fonotaga o i luma o le a maea tapena ai ona tuuina mai lea o lea vaega. Atonu o vaega ia na fia maua atu ai se faamatalaga lau Afioga i le Fofoga Fetalai.

O le fautuaga a le Taitai o le Itu Agai o le galulue lava i nisi o vaega pei ona saunoaina foi e le sui o le Komiti, e le o i ai se vaega o atagia mai le Lipoti. Ae faafetai mo fautuaga.

O nisi o fautuaga na tuuina mai, o le a galulue pea i ai le Matagaluega.

**Afioga Fuaava Suluimalo Amataga:** Lau Afioga i le Fofoga Fetalai...



**FOFOGA FETALAI:** Malie lau Afioga i le Minisita mo le... se i tulai mai le sui usufono mo Aleipata Itupa i Luga.

**Afioga Fuaava Suluimalo Amataga:** Faafetai i lau Afioga mo le avanoa. Ona o lea ua maitau atu o lea ua faaiuiu mai le saunoaga manino a le Afioga i le Minisita, ae i ai le manatu mo tatou faamaumauga, ona ou te maitau atu o lea e saunoa mai le Afioga i le Minisita, atonu ai o lou sui usufono sa faia le faaupuga lea o le solar system. Ae pei o le agaga, atonu e manino pei o le tele lava o se faamatalaga sa agai i le solar power system. Atonu o lea e saunoa mai i le solar system, ia o le mea foi lele e i ai le paneta ma mea uma.

Ia e pei la o se mea lena ne i te i ua feseai ai se faafofoga pe a faapea na ou fai atu o le solar system, ae pei o le agaga lena o le solar power system lea e talanoa ai ona o le malosiaga mai le la. Aua o le system latou ia e tai pei lava foi o le Maota nei, lea na faaletonu le tatou PA System, po o le Communication System ia o mea uma lava ia faapea. A o le agaga sa avatu ai, o le solar power po o le malosiaga faafouina lea mai le la. Ae le o tulaga foi lele i le mea e taamilomilo i le vateatea i le la ma le masina aemaise foi o Pluto ma isi foi vaega uma faapena. Ma le agaga faaaloalo. Mo faamaumauga lava ia sao ma manino. Faafetai.

**FOFOGA FETALAI:** Masalo lau Afioga i le Minisita pe... Ia o lea ua faasao mai le saunoaga a le sui usufono mamalu, o lo o i ai le power i le va o le solar system. Saunoa mai lau Afioga i le Minisita.

**Afioga Hon TOEOLESULUSULU CEDRIC POSE SALESA SCHUSTER:** Leai, o le agaga lava lea, ia lea ua toe faasao mai lana saunoaga, o le solar system lea na sau muamua, o le ala lea na ala ai ona avatu foi se tuualalo. Ia afai o le solar power system, ia ou te le iloa la po o le a le mea e tau o le solar power system lau Afioga. Faafetai.

**FOFOGA FETALAI:** Ia tatou malilie ia... Ia tulai mai lau Afioga i le Minisita o Galuega Tetele.

**Tofa Hon Olo Fiti Afoa Vaai (Minisita mo Galuega, Felauaiga ma Atinae Eseese):** Faafetai tele i lau Afioga ona e i ai fesili sa manaomia ai se tali atu a le matou Matagaluega, e puupuu lava, i le tulaga lea o le taofiga po o se mea faapena i kamupani foi ia latou te fausia le power. O le taimi nei lau Afioga ma le faafofoga foi a le Palemene, e tolu a tatou kamupani lea ua faasolo le approve ina o latou PPS ma le faatalanoaga lena ua i ai le tatou bio-mass i Tafaigata lea e faaoga e maua ai le tatou power mai le susunuina o le lapisi, se i tulou le Maota. E faapena foi la le tar recycle pei ona taua e le sui usufono mo Faleata 3 e maua ai le tatou kiso e faaoga i le tatou generator, ma le Green Energy Holding, o le kamupani la lea lea foi ua faagasolo le latou turbine farm mo le savili.

Lau Afioga i le Fofoga Fetalai i le tulaga o le mataupu lea i tatou pe'ape'a o lo o i Aleipata, ia e le o toe i ai se mafaufauga o le EPC, le tatou Matagaluega e toe faatu ai i ina se turbine, ona o le turbine lena, e 245 kilowatts lona malosi, ae lua turbines tetele, pe'ape'a tetele lava na e i ai, e oo mai le taimi lenei e le atoa se sefulu o se kilouati e maua mai ai, ona o le tulaga foi lea e le i lava lelei feasibility studies i le mea e maua lelei ai le windspeed malosi foi lea e faatinoina tulaga ia. Ae o se mea e taua foi le tulaga o le power e maua mai le savili.

O le isi vaega lea lau Afioga i le Fofoga Fetalai mo tatou solar, o lea foi ua amata ona tapena le tatou expression of interest i le tele o kamupani e pei foi ona ou taua muamua e agai mai ai e fia fai a latou solar ma tulaga faapena. Pei lava ona ou fai atu e oo atu ia Iulai ua maea tapena le vaega lena ona tatou faasolo ai lea. Ae ne i te i ua i ai ni mafaufauga foi lea faapea ia tatou alu lava e sue le eletise lea mai le malosi faafouina. O le talitonuga o le EPC lau Afioga i le Fofoga Fetalai ma le mamalu o le Maota, e tataua lava ona reserve pea a tatou afi moli afi kiso, ona o le tulaga foi lea o le taumafai e sustain le tatou power i le taimi foi lea e ufitia faafuasei ai tatou solar panels i se paolo i tulaga faapena. E le gata foi i lena, a o taimi foi ia ua tatou try up ai i le season mugala, ia e faapena lava ona reserve a tatou afi diesel ma tulaga faapena, ona o le taimi lenei e le o talia. Masalo o lea ua aumai le finagalo o le Minisita o le MNRE e talia ai a tatou battery storage, ina ia faatumauina le taofiga o le power lea mai le solar.

E pei o nai mea na lau Afioga i le Fofoga Fetalai e tau faapulapula atu ina ne i te i ua i ai se faanenefu foi lea i sui usufono mamalu o le Palemene. Ma le faaaloalo lau Afioga.

**FOFOGA FETALAI:** Malo faafetai.

**Tofa Lealaipule Rimoni Aiafi:** Lau Afioga i le Fofoga Fetalai...

**FOFOGA FETALAI:** Ia, se i tulai mai le sui usufono o Faleata 3.

**Tofa Lealailepule Rimoni Aiafi:** Faafetai o lea ua... Ua ou toe tu atu lau Afioga ona o lea ua faamanino e le Afioga o Minisita o Galuega le mea lea sa ou aveatua. O le popolega la ia te au, e moni o lea e i ai le energy board, tagata foi ia e grant ina e avea le laisene e faataga ai mea nei. O lea tatou te malamalama lelei, a e taamilo i le lalolagi, o le tele o le fund lea e available i mea ia faapea, renewable energy. O le popolega la lea e i ai e omai tagata ma idea nei ona omai loa lea taumafai e faatu i Samoa e maua mai ai le funding ae le sustainable, e le fetauti. O le mea na ou fesili atu ai, po o ai tonu e i ai le final say, aua o lea ou te iloa e lua mea o le development ma le environment. Afai o le finagalo o le Minisita o le Siosiomaga e tele le afaina o le siosiomaga i le mea lenei, o lou talitonuga e le tataua ona faaauauina aua tatou te faamuamua le siosiomaga i lo mea ia.

O le tele o kamupani lea na saunoa i ai le Afioga i le Minisita o Galuega, ua leva ona i i nei ae le i avea i ai ni laisene e operate ai, ona o le popolega lea mai le Matagaluega o le Siosiomaga. Ae o le tulaga lea o le fautuaga lea i a oulua Afioga, ia tatou te manao uma lava i le i'a ae pei e taua le upega. Ia ma le faaaloalo lava. Faafetai.

**FOFOGA FETALAI:** Malo faafetai. Ia atonu o lea ua aumai foi fautuaga a sui usufono mamalu, o lea foi e faafogafoga mai lau Afioga i le Minisita ma le tatou Malo... Ia, se i tulai mai lau Afioga i le Minisita.

**Afioga Hon TOEOLESULUSULU CEDRIC POSE SALESA SCHUSTER:** Lau Afioga i le Fofoga Fetalai, faafetai. Ia na ona toe fesoasoani atu lava i le fautuaga a le sui usufono. O le taua lea o le tatou National Energy Coordinating Committee e faatalanoa ai manaoga ma atugaluga faale-siosiomaga ma faale-EPC ma itu foi tau seleni, tatou tupe. O le Komiti la lea latou te iloilo ina ia... a oo ifo... o le faatinoina lava o le PPA o le EPC le galuega. Ae manaomia foi la Lipoti i IA ina ia mafai ona... afai ua faamalieina se atinae ua mafai ona i ai uma aafiaga ia o le siosiomaga ma i ai foi ma aafiaga tau seleni. A o i e talanoaina ai, ona maua ai lea o le faaiuga ae tapena e le EPC ma faatino e latou le PPA ona o latou e faatauina mai le eletise mai nei kamupani. Faafetai.

**FOFOGA FETALAI:** Malo faafetai.

**Tofa Hon Olo Fiti Afoa Vaai:** Lau Afioga i le Fofoga Fetalai o si mea puupuu lava lea lau Afioga.

**FOFOGA FETALAI:** Ia, tulai mai lau Afioga i le Minisita.

**Tofa Hon Olo Fiti Afoa Vaai:** O mea ia o laisene e saunoa i ai le sui usufono mo Faleata 3, ua leva ona i ai laisene. Matou te taunuu mai lava ua i ai laisene ua uma ona issue laisene o kamupani nei. Pau lava le faatuai lea na i ai, o le tausailiga o ni a latou funds e faatino ai poloketi ia. Ma le faaaloalo.

**FOFOGA FETALAI:** Malo faafetai.

**Afioga Fuaava Suluimalo Amataga:** Lau Afioga i le Fofoga Fetalai faamolemole...

**FOFOGA FETALAI:** Ia o lea ua saunoa le Minisita. Pe i ai se isi mea e ese mai?

**Afioga Fuaava Suluimalo Amataga:** O se faafesili lava lea i le saunoaga a le Minisita e fia malamalama ai lou sui usufono. O le

saunoaga lea a le Minisita i le feasibility lea o tatou wind turbines lea i Aleipata, e pei o se faafesili foi lele po ua faagasolo la, aua o le taimi lenei, sa fua foi i suesuega sa faatino na ala ai ona faatu tatou turbines. O turbines foi lea i Aleipata, nai tamai turbines lava. Ou te iloa ua silasila le Afioga i le Fofoga Fetalai i le matou malaga lea na i ai, o mea la na e tatau o turbines na e i ina i Saina, mea tetele ia. Ae pei o nai mea ia, e pei o se mea foi lea e fesoasoani i le tatou feasibility. O lea la ua e saunoa e tele le mea na design ai e 200+ kilouati a o lea pei na o le fia sefulu ea. Ae pei o nai mea ia po ua faaauau la nisi mea, aua manatua o le tele o suesuega, tele le information, ou te iloa foi o le a... aua na o le pau lea o vaega o Samoa sa maua i faamaumauga i le taimi lena aemaise lava o le vaega a le MET o lo o feoloolo ai le mea o le savili, aua o le savili lea o lo o faaoga mo le... Ia na o se faafesili lea ma le agaga faaaloalo, ae afai o faaauau, faafetai. Ma le agaga faaaloalo.

**FOFOGA FETALAI:** Lau Afioga i le Minisita mo Galuega Tetele.

**Tofa Hon Olo Fiti Afoa Vaai:** Ia, faafetai. O la e faaauau. Faafetai.

**FOFOGA FETALAI:** Malo faafetai. Tulai mai lau Afioga i le Taitaifono mo le lafo.

**Afioga FEPULEAI FAASAVALU FAIMATA SU'A:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoao le P.P.2022/2023 Nu.119, Lipoti a le Komiti o le Vaega o Atinae Eseese i le P.P.2021/2022 Nu.3, Lipoti Faaletausaga a le Matagaluega o Punaoa Faalenatura ma le Siosiomaga mo le Tausaga Faaletupe 2019/2020.*

*Faaluaina e le sui usufono mamalu mo Lefaga ma Faleaseela.*

*Na faamaonia le lafo.*

**FOFOGA FETALAI:** Tulai mai lau Afioga i le Minisita mo le lafo mo le Lipoti a le Malo.

**Afioga Hon TOEOLESULUSULU CEDRIC POSE SALESA SCHUSTER:** Lau Afioga i le Fofoga Fetalai ou te faatu le Lafo; *Ina ia faamaonia e le Fono Aoao Tali a le Malo i le Lipoti a le Komiti o le Vaega o Atinae Eseese, e pei ona faataatia i le Laulau-a-Fono.*

*Faaluaina e le Minisita mo Galuega, Felauaiga ma Atinae Eseese ma le Minisita mo Fesootaiga ma Faamatalaga Tekonolosi.*

*Na faamaonia le lafo.*

**2. P.P. 2022/2023 NU.110, LIPOTI A LE KOMITI O LE VAEGA  
TAU LE TAMAOAIGA I LE P.P. 2021/2022 NU.20, LIPOTI  
FAALETAUSAGA A LE FAALAPOTOPOTOGA O ESETETE  
TAUSI A SAMOA MO LE TAUSAGA FAALETUPE 2019/2020  
- ILOILOGA**

**2.1. P.P.2023/2024 NU.73, TALIA LE MALO I LE P.P.2022/2023 NU.110,  
LIPOTI A LE KOMITI O LE VAEGA TAU LE TAMAOAIGA I LE  
P.P.2021/2022 NU.20, LIPOTI FAALETAUSAGA A LE  
FAALAPOTOPOTOGA O ESETETE TAUSI A SAMOA MO LE  
TAUSAGA FAALETUPE 2019/2020.**

**3. P.P.2022/2023 NU.111, LIPOTI A LE KOMITI O LE VAEGA  
TAU LE TAMAOAIGA I LE P.P. 2020/2021 NU.79 &  
P.P.2021/2022 NU.28, LIPOTI FAALETAUSAGA A LE  
FAALAPOTOPOTOGA O ELEELE TUMAOTI A SAMOA MO  
TAUSAGA FAALETUPE 2019/2020 MA LE 2020/2021 -  
ILOILOGA**

**3.1. P.P.2023/2024 NU.118, TALIA LE MALO I LE P.P.2022/2023 NU.111**

**FOFOGA FETALAI:** Tulai mai lau Afioga i le Taitaifono o le Komiti o le Vaega Tau le Tamaoaiga, lau Afioga Niuava.

**Afioga NIUAVA ETI L. MALOLO (Taitaifono o le Komiti o le Vaega Tau le Tamaoaiga):** Faafetai lau Afioga i le Fofoga Fetalai. E manatu foi o lea ua maea ona utuutu mamalu, le safolau o le Palemene. Ua maea foi ona e sisi le atumua o le malama o le taeao ua sola, ia manatu lea o lea ua fofogatali le Agaga Paia o le Atua ona o lau Afioga foi o le Aoa Fesoasoani ua tau ai le tatalo e pei ona e taitaia ai le Palemene i le taeao.

E faatalofa foi i le Palemene o Samoa, e faatalofa foi i le atunuu o lo o faapea ona faafofoga mai.

Lau Afioga i le Fofoga Fetalai ou te faatu le lafo; *Ina ia faautagia e le Fono Aoa Lipoti e lua a le Komiti o le Vaega Tau le Tamaoaiga o lo o tuuina atu ai ana Sailiiliga, Fautuaga ma Iugafono, o le lafo lea.*

*Faaluaina e le sui usufono mai Falealili 2 ma le sui usufono mo Gagaemauga 2.*

*Na faamaonia le lafo.*

**FOFOGA FETALAI:** Ou te tapa lau Afioga i le Minisita o le Faalapotopotoga o Esetete Tausi a Samoa.

**Afioga Hon TOEOLESULUSULU CEDRIC POSE SALESA SCHUSTER:** Faafetai i lau Afioga i le Fofoga Fetalai.

Lau Afioga i le Fofoga Fetalai, ou te faatu le Lafo; *Ina ia faautagia e le Fono Aoao Tali a le Malo e faatatau i Fautuaga o Lipoti e lua a le Komiti o le Vaega Tau le Tamaoaiga.*

*Faaluaina e le Afioga i le Minisita mo Taaloga ma le Minisita mo Fesootaiga ma Faamatalaga Tekonolosi.*

*Na faamaonia le lafo.*

**FOFOGA FETALAI:** Ia o lea ua maea ona faautagia e le Fono Aoao Lipoti a Komiti ma Tali a le Malo ma o le avanoa leni e tuuina atu i sui usufono, ia e taitoalua mai le itu aua le tatou Lipoti. Ia, ua avanoa.

Se i tulai mai lau Afioga i le Taitai o le Itu Agai e fai ma sui usufono e toatasi o lea itu.

**Susuga Hon TUILAEPA FATIALOFA AUUELE SAILELE MALIELEGAOI:** Lau Afioga i le Fofoga Fetalai e momoli le faamalo i le Komiti ma le latou Lipoti ma e taua tele le Lipoti leni ona o le Faalapotopotoga leni a le tatou Malo e faalagolago i ai le tele o atinae e mafai ona fai, e mafai ona faatino ai ituaiga metotia eseese a le tatou Malo. Toe pau foi lea o le vaega eleele mo le fanua o lea o lo o totoe ae ua faamatuuese uma atu le Esetete po o eleele sa i lalo o le Esetete Tausi i le Faalapotopotoga fou o le SLC e latou te faafoeina mo le faamatuu atu i tua i atinae eseese o le tatou atunuu.

E taua tele le Lipoti leni ona ua tele taumafaiga ina ia toe lalaga ai atinae a le Esetete Tausi sa matua iloga le tulai mai i faatoaga faaneionapo eseese e aofia ai manupapalagi, o le popo, o le koko. Ae talu ai faafitauli na feagai ma tatou i afa tetele sa feagai ma tatou o le ala lea o le toe fetuunaiga ua fai ma ua faamatuu ai i tua le tele o eleele.

E lua nai vaega ou te fia fesili ai i le Komiti, o le tulaga lea i le faaaogaina o le tatou fale lea na faatau i Aukilani e mafai ona avatu i ai oloa a le Esetete Tausi. Ma o le agaga foi ia faaaoga uma e tatou exporters ona o le faafitauli lea e tulai mai, e o atu tatou exporters, tagata e avea oloa a Samoa i Niu Sila i Aukilani ae o atu ua pulea uma e Initia mai Fiti le tele o faleoloa nei. E i ai la le taimi e avatu ai le tatou talo ona nonofo lea o Fiti ma faaaoga tatou talo lelei lava ma ta'u o talo mai Fiti ae aveane latou talo susu tuu i luga ma faasalalau, o talo na a Samoa. O mea ia na tutupu, ua tele ai fautuaga sa aumai i le tatou Kapeneta e lelei ia ona fai lava se tatou fale.

Sa i ai fale muamua na fai e lua ae na toe faatau ese ona ua tele ina gau ai le Malo, lea la na toe lalaga ai le tulaga lea ma e faavae ai manatu na e amata e le Esetete Tausi ae tataua ona maua le avanoa e tatou tagata aveoloa i fafo taitasi e mafai ona latou faaaogaina.

Ua tele lava taumafaiga a tatou i le itu lea, e fai lava ma gau ona o le tulaga lea o le faaaogasese o nei fale. Ua le faaaoga e faatau ai mea a le

atunuu, ae sue atu foi ua fai ai foi ma pisinisi a latou ia e faagaioia fale nei. O le mea lenei na tupu i le taimi o le Esetete Tausi.

O lea la e faafesili atu ai, poo le a le faiga lea ua i ai nei. Taatia ia taimi ia na faaletonu ai tatou ona o le tulai mai o le faamai, faamai e lua tetele ia na afaina ai tatou. A o lea la ua uma le faamai, o le a la le tulaga ua i ai nei? Ou te fia malamalama i le itu lea leaga e i ai le taimi na ou asiasi ai i Aukilani ou te alu atu ua vaoa lumafale o le fale ae leai ma se mea o faatau ai. Ou te fiamalamalama po o le a le gaioiga o fai i ai?

O le vaega lona lua, o le itu lea i vanilla. Ma ou te faamalo i le Esetete Tausi i le atinae lenei o le vanilla. Ou te lagona a maua lelei se maketi e lava le tupe a le Esetete Tausi e ono maua mai ai i le vanilla. Ua toto le vanilla ma ua ola ma ua iloa foi e o tatou tagata ona faafua ona o le isi lea laau e maua lava le organ male and female organ i le flower e tasi.

O le mea la ua tupu, o le laau lenei sa ola i Amerika i Saute. Ia ona o atu lea o tagata o isi atunuu aumai e faaola i o latou atunuu ma le le iloa e faafeusuai e le tamai manu lava na o Amerika i Saute e ola ai. O lea la na toe mataitu ma iloa ai e tataua ona faatino manually le faafeusuaiga e faaoga ai se fasilaau e pei o le tele o le afitusi. O lea la ua matua lava laau ia e toto, toe pau lava le mea lea e totoe o le saili o se maketi tatou te faipaaga. O lea la sa i ai latou mai Iapani e faipaaga, a mafai ona maua se paaga faapea e mafai ona alu atu ai le vanilla, ou te lagona o i e maua ai se tupe tele a le Esetete Tausi.

O le faamatalaga o le laau lea i Fiti, fai mai le tagata o lea na ia faia le atinae lea, a alu atu le tagata ma lana uta popo e tumu le 9ton truck ae alu atu le loomatua na o le afa atigipaelo laitiiti o vanilla, e sili atu ona tele lana tupe e maua mai tamai vanilla ia nai lo le uta atoa lea o popo e ave e fua, popo mago.

O le itu lenei e taua tele ai le matua uunai o le tatou vanilla ae moomia se faipaaga. Ia ma o le fautuaga foi lenei i le Pulega o le Esetete Tausi e taumafai e saili se tatou faigapaaga ma i latou e alu atu ai le vanilla lea ona foia loa lea o le tulaga tau tupe a le Esetete Tausi.

Lau Afioga i le Fofoga Fetalai ia na o nai fautuaga na i le Minisita o lo o faafoea le Esetete Tausi i le taimi lenei.

**FOFOGA FETALAI:** Malo faafetai mo fautuaga aemaise foi le... ia se silafia faapitoa i lenei foi laau aoga i le atunuu, malo mo le saunoaga.

Tulai mai lau Afioga i le... oi se i tulai mai le Sui Usufono Tamaitai mo Alataua i Sisifo ma o le tatou toe sui usufono foi lea o le itu lea.

**Afioga ALIIMALEMANU MOTI MOMOEMAUSU ALOFA TUUAU (Sui Usufono Tamaitai - Alataua Sisifo):** Faafetai mo le avanoa. E faatalofa atu i lau Afioga i le Fofoga Fetalai, le Afioga i le Tamaitai Palemia faapea Minisita o le Kapeneta, Minisita Lagolago. Ia tainane foi le afio atu o le Taitai ma lenei Itu o le Malu i sui usufono o lo o agaia le tatou Malo.

Ae momoli le faafetai i le Taitaifono o le Komiti i le Lipoti manino. Ae ou te fia faatepa lava le Maota i le Lipoti a le Suetusi i le Lipoti lea Faaletausaga a le Esetete a Samoa 2019/2020. O lea o lo o i ai le manatu faapitoa o le Suetusi i le tulaga e i ai pea le masalo pe mafai ona faaauuina e le Faalapotopotoga, e pei o se pisinisi alualu pea ae fuafua lea i le faalagolago tele i tomai o le Komiti Faatonu faapea le Pulega e mafai ai ona faaauau ia fuafuaga.

E le o se mea fou, o lea ou te iloa ua leva ona gau le Esetete Tausi, sa fai foi ma matamata i nisi o Lipoti i tausaga ua te'a. O le atugaluga lea o le Au Suetusi pe mafai ona faaauau fuafuaga o lo o i ai nei i le Esetete Tausi i le tulaga i mea tau tupe aua o lea e maitau atu e \$7.3 miliona tupe gau o le tausaga lea. O lau fesili la i le Afioga i le Minisita, o le a se tatou fuafuaga i le faaauau o le tatou Faalapotopotoga lea aua e maitau atu i tausaga uma lava seiloga e ave i ai se injection po o se tupe a le Malo e faalava ai le latou operations i o latou totogi ma le faagaioiina o le latou Matagaluega po o le latou Ofisa ona faatoa mafai lea ona auau le faasoa a le Esetete Tausi. Na o se manatu ma se fesili e faatupu manatu.

O lea ou te iloa e tele a tatou fanua o lea foi e sau i le Lipoti o lo o i ai mea o lo o to'a ai, ona e tataua ona faaoo atu le suavai ma le eletise faatoa mafai lea ona lisiina atu le tele o fanua ia e fuafua i ai e maua mai ai nisi tupe a le tatou Esetete Tausi.

O le lona lua e maitau atu i tua i mea ia o oloa ma fua o faatoaga o le tele vaeatu le Maota ma le faafofoga mai a le tatou atunuu. E vaai atu e 35 mamoe na mamate, i le faitauaofai o manupapalagi ma mamoe i i, aua o mea nei e alu i totonu o le Tala o le Tupe. E tele tele a tatou manu mamate lea e i totonu i i, o le a se fuafuaga i i pe afai o le aofai lava lea o mamoe e mamate le average i tausaga uma pe tataua ona faaauau ia ituaiga atinae?

Ia ona oo mai lea o se tala mulimuli, e puupuu lava se manatu aua pei ona fai atu e le o se mea fou a o luitau ia tatou te feagai ma tatou, ina ia i ai se agai i luma o le tatou Esetete Tausi i le mea o lo o tele ai fanua a le tatou atunuu e mafai ona faaaoga aua nisi o atinae. Ona oo mai lea i le... ua uma ea na taua e le Afioga i le Taitai o le Itu Agai. O lea e faapea mai le Tali a le Malo o lea e i ai le fuafuaga a lelei ona faagasolo le tulaga lea i le tatou Export Authority o lo o faagasolo nei o le tali lea, ina ia mafai ona maua ai nisi tupe a le tatou Esetete Tausi. O lau fesili la; o a mai le faagasologa o le tatou Export Authority? Ma le faaaloalo lau Afioga i le Fofoga Fetalai.

**FOFOGA FETALAI:** Malo faafetai, malo le saunoa faafetai foi mo fautuaga. Ia tulai mai lau Afioga i le Taitaifono.

**Afioga NIUAVA ETI L. MALOLO:** Faafetai i lau Afioga i le Fofoga Fetalai, faafetai foi mo sui usufono mamalu le Afioga i le Taitai o le Itu Agai aemaise foi le Sui Usufono Tamaitai mo Alataua i Sisifo.



O le mataupu lea i le Vaega 1 e pei ona i ai le faafesili foi a le Afioga i le Taitai o le Itu Agai, i le tulaga foi lea i le fale lea i Aukilani. Masalo o se taimi ona faamanino lea e le Minisita le tulaga ua oo i ai a o le silasila i ai foi i le tali mai a le Matagaluega o lea ua maea ona faataoto le isi alafua a le Faigamalo e pei ona i ai le tatou Export Authority lea ua faapea ona faagasolo ia o i ina lea o le a agai i ai le Afioga i le Minisita ma le Matagaluega, e toe tapue mai ai lea aseta a le tatou Malo e pei ona i ai le fale lea i Aukilani.

E lagona foi le agaga fiafia o le loto i tulaga foi e pei ona... e tele le silafia o le Afioga foi i le Taitai o le Itu Agai i le tulaga i le vanilla e pei ona aumai ai le fesoasoani i le tulaga foi lea e tasi lava le fugalaau ae mafai ona feusuai e pei ona i ai, e manino lelei le saunoaga.

O le tulaga i le maitau a le Komiti ina ua agai atu le asiasiga foi a le Komiti, e pei o le faafitauli tele lava o lo o feagai ma le vaega lea o le tulaga lea i le aufaigaluega e tele foi lava ina fai ma vaea ona o le tulaga foi e pei ona silasila foi le Palemene i tulaga foi o Lipoti a le Matagaluega po o le tatou Esetete Tausi. O lea ua malama ulugalua e pei foi ona saunoa le Sui Tamaitai ia ou te momoli foi le agaga faafetai i Afioga foi i Ofisa Sili o Pulega sa taumafaia maiga lenei atinae i le toa foi o le loto e ui lava ina gau ae na taumafai lava i ni auala ina ia tau faaolaola ai le atinae nei, ona o fuafuaga lelei foi sa faataoto e le faigamalo ua mavae atu e taumafai ai ia atinae nei. Peitai ua le ogatasi le futia ma le umele i tulaga foi o le fuafuaga ma le tali mai o nei atinae. O le tulaga la lena o lo o i ai ma ou te taunuu atu ua faaitiitia le aufaigaluega ma ua... a o la e lelei a fua o le tatou vanilla na molimauina foi e Sui o le Komiti, le Afioga i le Sui Taitaifono le Afioga ia Lautafi aemaise foi o le Saienitisi le Afioga ia Fuaava, o i matou ia sa agai atu ma Sui o le Komiti e molimauina foi lea atinae.

Ia ae pei o le faafitauli tele lena o lo o taoto i ai i lea foi atinae e tele mea e le lava le silafia foi o le aufaigaluega o lo o i ai e fai ai le atinae o lo o i ai nei aemaise lava le atinae lea o le vanilla i tulaga i le laau e ola ai luga le vanilla, ia pe faafefea ona feusuai. Ia o le teuga foi, ia o nai toa taulia na o lo o feagai ma le aufaigaluega e pei ona i ai le atinae lea.

Ona oo mai lea i le faafesili foi a le Sui Usufono Tamaitai o Alataua i Sisifo ia faafetai, faafetai mo le fautuaga foi. Masalo o se taimi foi ona tali lea o le Afioga i le Minisita po o fea ua taoto i ai le faaauau o le tatou vaega lea e pei ona tatou silafia foi e \$7.3 miliona pei ona saunoa sui usufono mamalu le gau. Ia e oo mai la i le taimi lenei e pei foi ona i ai le Lipoti mulimuli foi, ia o lo o i ai lava le... ae manatu o lea ua faafofoga i le polokalame ma le faataotoga foi o fuafuaga a le Minisita o lo o i ai i le isi auala e agai i ai le tatou atinae lea ia ma le tatou Faalapotopotoga lea i se auala ina ia toe maua mai ai se tupe lelei a le tatou Malo.

E moni le saunoaga, masalo o le tatou Lipoti lena o lena e i ai le faatupulaia pea o le mamate o tatou mamoe. O le asiasiga talu ai nei e aumai le Lipoti e 6 mamoe o totoe ae 4 mamoe pepe. E pei foi lava ona avatu o le tulaga foi lea i le tulaga i le aufaigaluega. E pei o le isi lena

vaataulia o lo o tuia ai le galuega a le... ona o le leai o ni tagata faigaluega e vaaia lelei tatou vaega ia, pei o le tulaga lava lea i le afaigaluega. A fua foi i ai i le taumafai a le Matagaluega ia o le agaga lena e i ai sa i ai le agaga foi lele e ave le faamalosiua i le afaigaluega, o alo ma fanau a le atunuu o lo o taumafai.

O lea la ua sui le Afioga foi i lē o lo o Faauluulu i ai le tatou vaega lenei, ua tulai mai foi si alo tamaitai foi lea o le tatou atunuu. Ia o lo o taumafai foi lona ia silafia ina ia taumafai ona tau faaolaola mai le tatou Esetete Tausi, ae o lo o vaaia lava le tulaga foi o lo o i ai. Ae o lea ua taoto i le Minisita le tulaga e agai i ai le faaauuina foi o lea atinae aemaise foi tupe a le Malo o lo o faapea ona gau ai i le tatou vaega lea. Ia e pei o se talifuaitau lea lau Afioga i le Fofoga Fetalai.

**FOFOGA FETALAI:** Malo faafetai le saunoa. Ia se i tulai mai lau Afioga i le Tamaitai Palemia.

**Afioga Hon FIAME NAOMI MATAAFA (Palemia):** Faafetai i lau Afioga i le Fofoga Fetalai mo le avanoa. Ou te manatu ae le i saunoa le Minisita e tusa ai ma faamaumauga o Tali a le Malo i le Lipoti lenei i le Esetete Tausi, e ao ona avatu pea se tala i le tulaga o Faiga Faavae ma nisi o suiga talu mai le faataatia o Lipoti ma Tali.

Lau Afioga i le Fofoga Fetalai ma le Maota atonu o lea ua silafia le toe fetuunaiga o nisi o Matagaluega ma matafaioi ma tiute o Minisita. O se tasi o na suiga o le tuufaatasia lea i lalo o se Matagaluega e tasi o mataupu tau eleele, e aofia ai le Esetete Tausi ma le Faalapotopotoga o le SLC, ma le tatou Fono Faatonu o Eleele o lo o i lalo o le Matagaluega o le Siosiomaga.

O le faamoemoe o le Malo o le faatulai mai o se Matagaluega e ta'u o le Matagaluega o Eleele. E ala ona ou tulai atu i le tulaga lea ona o lea tatou te talanoaina le Lipoti i le Esetete Tausi. Ou te manatu lau Afioga e taua mataupu o lo o aumai i Lipoti ona o lo o fau i luga o tatou Lipoti Faaletausaga, e faapena ona faagasolo ai le galuega a le Taitaifono ma le mamalu o le Komiti ma faapena ona faatulaga mai ai nisi o fautuaga e pei ona faamauina i a tatou Lipoti, talifuaitau foi le Malo. Ae o lou tulai atu ona o le feseetaiga ia o Faalapotopotoga ma Matagaluega a le Malo ma le tuutasia uma o eleele aemaise eleele a le Malo i lalo o se faamalu e tasi. Ua i ai foi la le vaaiga faa-Faiga Faavae aemaise le tatou Esetete Tausi pe o le a faapea ona faaauau, o lea tatou te maua tatou te talanoa i le Esetete Tausi o se aseta a le Malo o lo o faagaoioia faapisinisi pe a, e ui e gau ma e i ai atinae eseese o lo o i ai i totonu. O lea foi ua agiga a tatou fuafuaga mo le tatou Faalapotopotoga lea o le auina atu o oloa i fafo ma se fesootaiga o se faamoemoe sa i ai se vaaiga i aseta aemaise o aseta e i ai fua o faatoaga.

Pe agai atu i fafo aemaise foi le aseta o le fale lea i Aukilani lea ua talanoaina, ne i te i ua umi sau faamatalaga i se taimi o le a faapea ona fofola Faiga Faavae mautu a le Malo e uiga i le liliuina o a tatou

Faalapotopotoga ia o le Esetete Tausi ma le SLC i lalo o le faamalu e tasi ma le vaaiga faale-Malo, i a tatou aseta faa-eleele. Ia pei o se faamatalaga aoao lea ona ua se'e le mataupu a o lea e taatia Lipoti ma Tali a le Malo. Ae ou te manatu e le aveesea ai le taua o mataupu lava ia e laga mai i le Esetete Tausi, o le faaaogaina o ana aseta aemaise o fuafuaga o le Faalapotopotoga. Ia aemaise foi i le itu lea sa taatia mai e gau, e tele tupe a le Malo e alu ai, ua tatau ona tatou fuafua i le agai i luma po o le a le auala pito sili e faaaogaina ai tatou aseta ia. O se faamatalaga lea ma le faaaloalo lau A fioga.

**FOFOGA FETALAI:** Malo faafetai malo le saunoa i lau Afioga i le Tamaitai Palemia...

**Afioga Alaiasa Moefaauouo Malagaitutogiai Sepulona Moananu (Anoamaa 1):** Lau Afioga i le Fofoga Fetalai leaga o au o le isi sui usufono o le Komiti...

**FOFOGA FETALAI:** Ia se i tulai mai lau Afioga i le sui usufono mamalu.

**Afioga Alaiasa Moefaauouo Malagaitutogiai Sepulona Moananu:** Faafetai o lea ua saunoa le matou Taitaifono, a o le mea lea na laga mai faapea o le Lipoti a le Suetusi, ia o Lipoti lava ia faa-Suetusi lea e i ai le tulaga lea leaga lea ua oo mai le aumaiga o Lipoti a le Matagaluega i le 2022. O le ata lava lea o le Lipoti a le Suetusi aua e tolu a latou ituaiga Lipoti, o le unqualify ia ma le qualify ma le disclaimer of opinion, e le i oo la i ai le Esetete i le mea mulimuli. O lea la e i i le mea lea o le qualify lea e aumai ai le fautuaga lea a le Suetusi. Ia o mea lava ia faa-Suetusi. E le o see ese ai la le vaai a le Komiti o lea lava na mataitu e le Komiti le tulaga lea. Ae pau le mea lea ou te fiafia ai au ia i le Esetete Tausi o le puipuia o le aseta lea e 6 afe eka a le Malo. Aua ana leai le Esetete Tausi ua leai se aseta. A 6 afe lea i le valuation lea pe 40 afe i le eka, o lea e te talanoa i le \$240 miliona, e \$10,000 i le kuata eka. E tele le mea e vaai i ai matou nei le Komiti mo le puipuiga o aseta a le Malo e le o se tamai mea. Mo le faamalamalama lea i lau Afioga. O le tulaga lea, e le o kea foi o lea e moi e alu, ae i ai le taua o le tupe aumai e puipui ai se mea lelei, aua o le faafitauli lea e tulai mai, e tele squatters i tatou eleele ia. Ma le agaga faaaloalo e le o faapea se loa o le vaai a le Komiti.

**FOFOGA FETALAI:** Malo faafetai malo mo le saunoaga a se tasi foi o sui usufono matua o le Komiti.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, o se mea e tatau ona faamalamalama.

**FOFOGA FETALAI:** Ia tulai mai lau Afioga i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** O mataupu ia tatou te talanoa ai, a maitau mai foi o lea e i ai fauatuaga mo le agai luma o le Esetete Tausi. Ou te le i talanoa i le gau, leaga e i ai atinae e le o maua ai ni tatou tupe a o la e alu lava atinae ona o le taua i le tatou atunuu. O le tele o atunuu i fafo o aoga uma lava e faapisinisi, e oo i falemai. O Amerika a leai sau insure e le mafai ona e alu e fai ni taotoga, ae le o faapena le tatou Malo. E tiga lava le tele o tupe alu ae i ai atinae e tatau ona fai, po o le a lava le tele o tupe e tatau lava ona fai mo le faaauauina pea, leaga e i ai le taua i le tatou atunuu. E i ai foi le manatu atonu tatou te le i oo i le taimi e tulai mai ai ni atinae tetele aua o lea lava e faatalanoa e matua toe liliu atoa ai le Esetete Tausi i le tulaga o le tele o tupe maua e maua mai ai. O le ala foi la lea o lea e matou te talanoa atu ai i le atinae lea o le vanilla. E tele lava le seleni e ono maua mai ai. O lea e i ai le maketi i le taimi lenei ae le o lava lau Afioga. O le mea la lena e ono galue i ai le Komiti. O le toe faaopoopo atu lena ina ne i te i ua ese le faitau i le vaaiga foi a lenei itu o lea tatou te taufai galulue uma i auala e ono galueina ai le Esetete Tausi mo le puipuiga o tatou aseta

**FOFOGA FETALAI:** Se i tulai mai lau Afioga i le Tamaitai Palemia.

**Afioga Hon FIAME NAOMI MATAAFA:** Lau Afioga i luga lava o tulaga o faiga faavae, e pei e maitau atu e tai aiga le saunoaga a le sui usufono mo Anoamaa ma le saunoaga a le Taitai o le Itu Agai i le itu o le puipuiga o se aseta.

Ae na na pau lava le mea ua ou toe tulai atu e fai sina popole o lou taofi o le saunoaga lea a le Taitai o le Itu Agai foi lea pe gau e tatau lava ona faaauau. E faaeteete lou taofi i le tauave o se manatu faapea, ona tatou te manatua uma, o matou ia e tau matutua e manatua le Esetete i aso a o la i le tele o tupe a le Malo e maua ai. O le fesili la; o le a le mea ua ese ai na taimi, o a mea... ia tatou te le talanoa ae tatou te talanoa i le mea lea e tupu.

Ou te faalogologo ma le totoa i le saunoa mai o le sui usufono o le Itu Agai i le taua o le vanilla, e sao lelei. O le isi fua o faatoaga lea e pito maualuga lona tau pe a fua i le mamafa, ae ou te le iloa po o anafea na gata ai se asiasiga a le Afioga i le Taitai o le Itu Agai i le faatoaga vanilla a le STEC ua tele a le faaletonu. O le mea a lea e tupu mai e fai atinae, ae o lea e saunoa isi sui usufono, either e le sustainable pe le mafai ona faaauau. Po o le mea e le o lava le silafia e tagata o lo o i ai le faagaioiga o le atinae. O fesili ia ou te iloa lea e feagai, e fai o le Komiti a o tatou uma o sui usufono o lo o vaai i le tamaoiga o le Malo,

A o le itu lena ua ou toe tulai atu ai e faaeteete lou taofi i le mea faapea e faaauau mea e gau ona e i ai lona taua. A faapea e taua, taumafai la e aua ne i gau, o le taua e aliali mai ai se tamaoiga ua faatupulaia, ae o le tatou o i se nauna lautele e i ai lava mea e gau ae tatau lava ona faaauau, ou te le iloa pe ou te ioe i lena aiga. E i ai auaunaga e pei o aoga, falemai

po o a tupe a le Malo e alu ai aua e le o se pisinisi, o le mea e tatau ona fai. Ae a faapea ua tatou faia faiga faapisinisi, e tatau la ona fai faalelei. A faapea e le mafai ona fai e tino faale-Malo pisinisi, ona tatou suea lea o ni tagata e iloa fai, aua tatou te manatua le taimi na ola ma manuia lelei ai le Esetete Tausi, tatou te iloa foi le taimi na amata ona tifa mai ai. Na tifa i le a le taimi? Ina ua tatou omai lava tatou e pulea a tatou aseta. O le mea la lenei, ia tatou toe vaavaai a tatou ia tatou po o lelei le tatou tausiga o tatou aseta ia.

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai mo le faasaoina o le taimi o le Taitaifono.

**FOFOGA FETALAI:** Malie le sui usufono mamalu se i tuu atu lava le avanoa i le...

**Susuga Hon Tuilaepa Fatialofa Auelua Sailele Malielegaoui:** Lau Afioga i le Fofoga Fetalai, e tatau lava ona ou tali i le mataupu lea.

**FOFOGA FETALAI:** Ia...

**Susuga Hon Tuilaepa Fatialofa Auelua Sailele Malielegaoui:** Ona ou te lagona e le o maua atoatoa e le Palemia le mea lea sa ou tulai atu ai. E i ai atinae e tele lava le tupe alu. Atonu o le upu lea gau e le talafeagai. E i ai atinae a tatou e tele lava le tupe e alu ai ae le talafeagai ma le tupe lea e maua mai ai ona tatou te le o sailitupe ai. O lea la sa ou tau atua ai aoga faapea foi le falemai. O isi atunuu o le mea lenei la e fai e matua faapisinisi lava ona fai, a o atunuu na e mauoa.

O lea foi la ou te talanoa atu i le itu lea e i ai atinae e tele tatou seleni e alu ae laitiiti seleni e maua mai ai ae tatau ona faaauau pea ona e i ai mafuaaga taua. Masalo o lea ma te talanoa i le nauna e tasi, o lea ua ou toe tulai atu ai e faamalamalama le mea lea.

**FOFOGA FETALAI:** Malo faafetai mea sili lea ua manino. Tulai mai lau Afioga i le Minisita mo Faatoaga.

**Susuga Hon Laauli Leuatea Polataivao Fosi (Minisita mo Faatoaga ma Faiga Faiva):** Faafetai mo le avanoa i lau Afioga i le Fofoga Fetalai. E le toe faasilia se leo o lea ua saunoa le Taitai o le Malo i le faiga faavae fou lea ua liliu i ai le Esetete Tausi ina ua tilotilo le Malo i le lua tausaga talu ai pe faapefea ona foia le faafitauli lenei o le Esetete Tausi.

E talu ona tulai mai le faigamalo fou na matua tilotilo lelei po o le a le auala e foia ai le faafitauli lea. Ua uma le gau, gauaano a ua gaulele. O le mea sao lenei na tupu. O lea ua saunoa le Afioga i le Tamaitai Palemia o lea ua sui le Faiga Faavae, ave uma eleele la e i le Esetete Tausi i lalo o se Matagaluga e tasi, aumai uma eleele la e i le Samoa Land, aumai eleele la e i le MNRE, avatu ma eleele ia e i le Esetete Tausi toe taumafai

e aputiputi eleele uma o le atunuu ina ia malu, e tau fai ai le fua lea e fai le taimi lenei e laugatasia le lisiina ma le vaaiga o eleele uma a le Malo.

Ae ua ou tulai atu leaga o lea ua... e fai le Lipoti lenei o lea ou te tauavea le Matagaluega ae ona o le suiga ua tulai mai, ua aumai nei fanua uma i le faaiuga lea ua fai e le Malo e ave i le Matagaluega e tasi ia eleele a o le Esetete Tausi lava ia o lea ua tapena ai le tatou Matagaluega fou lea o le Export Authority. Ua i ai le talitonuga o le Matagaluega fou lea o le a tatou toe faatulai ai le Esetete Tausi i le mea sa i ai muamua, le mea la lea e atugalu ai le Taitai o le Itu Agai. O poloka vanilla, o poloka niu, o poloka koko o atinae na taumafai e le Esetete Tausi, e le i manuia. Aisea? E le i taitai ona lava le tupe na ave e operate ai farming nei. A faapefea ona vaai i le na o le toalima tagata ae 70 eka a le poloka koko? E faapefea na ave na o le toalima tagata ae 50 eka le poloka vanilla? E faapefea na vaai? E le taitai lava le tupe na ave e le Malo e operate ai le Esetete Tausi. O le ala gau lena.

A o lea mea lea ua fai nei e pei ona saunoa le Tamaitai Palemia e ave poloka nei o Faatoaga nei lau Afioga i le Fofoga Fetalai...

**Susuga Hon Tuilaepa Fatialofa Auelua Sailele Malielegaoi:** O le faasaoga lau Afioga.

**FOFOGA FETALAI:** Malie lau Afioga i le Taitai o le Itu Agai se i faauma mai pea le saunoaga a le Malo ona tuu atu foi lea o le avanoa e te saunoa ai.

**Susuga Hon Tuilaepa Fatialofa Auelua Sailele Malielegaoi:** Ia ua lelei.

**Susuga Hon Laauli Leuatea Polataivao Fosi:** O le poloka koko, poloka kofe, poloka niu, poloka vanilla e aumai i lalo o le Faalapotopotoga fou lea la a fai e saili ai le auala e o atu tagata e operate poloka nei ma avea loa i latou e avea ma Commercial Farmers e support ai le aveina o le tatou oloa mai fafo ia i Commercial Farmers e support ai le tatou Export Authority. O i ina lau Afioga i le Fofoga Fetalai le manulauti lea ua tauave i le taimi lenei ina ia faatulai se itutino e mafai ona o e ave le tauaveina o poloka faatoaga nei o lea e i totonu o le Esetete Tausi o la ua i ai laau ae le o lelei le vaaiga a o le faamoemoe afai e faasalalau i le atunuu atoa, o lea ua i ai le poloka vanilla la e i Mulifanua e 50 eka o ai se tagata e ofoina mai e sau na te fia tauaveina, fai e ia tulaga o le aufaigaluega ma vaai lelei, teu lelei a maua ma fua mai o lana lena tupe ae aumai lana seleni e fesoasoani i totonu o le Matagaluega o le Exports Authority.

O lea foi na taua le fale lea i Aukilani. Ioe, o le faamoemoe lena o le Export Authority e nafa ma le vaaiga o le fale lea e o uma i ai tatou exporters lea e tau faamaopopo nei e le Matagaluega o Faatoaga ma Faiga Faiva e fai ma Drop Off ma devamp uma ai tatou container o lea e

ave i fafo. O le faamoemoega lena o lea e taumafai atu nei i le Faiga Faavae fou lea e i ai. Ma ou te talitonu o le tali lena o atugaluga lea sa tatou taumafai i ai i le Export Authority.

O nei i le Aso Faraile nei, ua aoga foi le avanoa lea, e fono uma ai exporters uma a le atunuu Aso Faraile nei i le ta o le 10, la e faafofoga mai. E omai faatoa feiloai faatasi lea o exporters uma a Samoa e ave oloa i fafo ma le Export Authority e faamatala i ai le mea fou lea ua finagalo i ai lo tatou Malo. O outou uma nei e avea oloa i fafo o le tou Matagaluga lea tou te omai tatou te militino faatasi.

O lea ua foai mai e le Minisita o Eleele le Ofisa Tutotonu lea sa i ai le Esetete Tausi i Vaitele faafesagai ma le Bluebird Lumber, o le nofoaga tutotonu lena lea o le a tu ai le tatou Export Authority. Ae ua ou manatu e tatau ona faamalamalama ina ne i meaane ua maitau mai le Palemene e le o i ai se galuega na fai mo le Esetete Tausi .

O le laveai lea ua fai, Esetete Tausi will now turn into Export Authority ina ia faaauau pea le tatou talitonuga o faatoaga e manuia ai le tatou atunuu ae faamaopoopo uma mai le au exporters o lo o avea le tatou oloa i fafo. Ma lou agaga faaaloalo.

**FOFOGA FETALAI:** Malo faafetai. Malie lava lau Afioga i le Taitai o le Itu Agai, se ua leva lava ona tau tulai mai le sui usufono lea o Lefaga ma Faleaseela. E te i totonu o le Komiti lau Afioga i le sui usufono mamalu?

**Susuga Hon Tuilaepa Fatialofa Auelua Sailele Malielegaoi:** Lau Afioga e agai tonu lau faasaoga i le saunoaga...

**FOFOGA FETALAI:** Se i tulai mai le sui usufono lea ua leva ona tau... se i tulai mai le sui usufono mo Lefaga ma Faleaseela.

**Susuga Hon Tuilaepa Fatialofa Auelua Sailele Malielegaoi:** Ia lelei.

**Afioga Masinalupe Makesi Masinalupe:** Faafetai mo le avanoa i lau Afioga i le Fofoga Fetalai e tusa ai o le ua manino lea vaega e pei ona faamalamalamaina foi e le Minisita sa i ai i le Estete Tausi. Ae ona o le tulaga lava ia i le faagasologa o galuega a le Komiti e pei ona saunoa i ai le Taitaifono o le ala lea e tau avatu ai se fesili e ese mai le tulaga e pei ona i ai, a o luga lava o lenei Lipoti.

E afua se fesili ona e tasi lea... o le oo atu foi o le Esetete Tausi po o le Pule Sili ma le... i le matou foi Komiti sa fesiligia ai le tulaga e pei ona iai le Bio-mass Project, ona o lea e maua e fai lava si tele o le... tele foi le faaletonu o lo o i ai. E mafua se tautalaga ona o le tulaga foi lea i le faatinoina ua le o lelei masini e faatino ai, lea sa talia.

O le agaga lena lea pei sa tau avatu ai ona e pei e maua foi a faapea e faatauva ma le tulaga e pei ona i ai le renewable energy e le taitai ona

tutusa le seleni o lo o maua i lea foi Project ma le tulaga e pei ona i ai le faatauavaga.

**Tofa Lealailepule Rimoni Aiafi:** Lau Afioga i le Fofoga Fetalai...

**Afioga MASINALUPE MAKESI MASINALUPE:** E pei o le agaga lea o lea e tau avatu ai le... pei ona i ai foi le fautuaga a le Malo, ia ae pei o le agaga lava ia ina ia fai se fuafuaga mo lea... aua o lea e utiuti le aufaigaluega ae maua foi i le tulaga e pei ona i ai e le o tulaga lelei mai foi lea atinae i lona faaaogaina. E fia maua ai se malamalamaaga i le Taitaifono po o le a le taatiaga o lea project ua i ai, le Bio-mass Project. Ma le faaaloalo lava, faafetai.

**FOFOGA FETALAI:** Lau Afioga i le sui usufono mamalu o lea e agai i le Taitaifono le... lea ua maea ua tolaulau lana tali?

**Afioga MASINALUPE MAKESI MASINALUPE:** Lau Afioga ona o lea sa faapea lava au, a uma le lua a o ona saunoa lea o le Taitaifono aua o lea e le i faia le avanoa o le matou lua.

**FOFOGA FETALAI:** Oi ia ua maea, ua uma ona tali le Taitaifono. Ia, o le tulaga lena o le tatou mataupu. E i ai se mea e ese mai Faleata 3.

**Tofa Lealailepule Rimoni Aiafi:** Ioe lau Afioga, o le ala tonu lea na ou tulai atu ai lau Afioga leaga o lea na ou ava lelei i lau Afioga ma ou le tulai atu.

**FOFOGA FETALAI:** Ia, o lea ua e faafogafoga mai o lea ua...

**Tofa Lealailepule Rimoni Aiafi:** Ia ae faafetai tele lava o lea o le a ou toe nofo la i lalo.

**FOFOGA FETALAI:** Ioe, leaga o le tausiga foi a le Nofoa e leai lava ma se mea o pau i le vaavaai atu a le Nofoa. O le mea lea...

**Afioga Sulamanaia Fetaiai Tauiliili Tuivasa (Vaimauga 1):** Lau Afioga i le Taitaifono o se mea e fia faamalamalama...

**FOFOGA FETALAI:** Sa e lauga i le Lipoti lea?

**Afioga Sulamanaia Fetaiai Tauiliili Tuivasa:** Sao lelei lau Afioga i le Fofoga Fetalai. O le tulaga e... ona o lea e maitau i le Lipoti a le Komiti lau Afioga i le Taitaifono o lea e aumai ai le talosaga mo afioaga ia e faalavelave i le galuega. A o lea e maua o le afioaga o le Minisita, o Satapuala...



**FOFOGA FETALAI:** Ia, malie le sui usufono mamalu...

**Afioga Sulamanaia Fetaiai Tauiliili Tuivasa:** Lea e faalavelave i i, ae faafetai o lea e afio mai le sui usufono lau Afioga i le...

**FOFOGA FETALAI:** Malie, malie mai le sui usufono mamalu, alaala mai se i fai atu le tala a le Nofoa. Se o tatou o le Maota o le atunuu e tatau ona tatou galulue faatasi, o tatou foi e puipuia a tatou galuega i Tulafono Tumau. Afai e te le i saunoa, ia ou te fautua atu ia manino pea ma to'a mai le tai, o lea e faasoaso atu le tatou galuega, e faapena. E tele lava isi mau Lipoti atonu e ono oo i ai outou finagalo ae ia tatou galulue faatasi mo le faataunuaina o le tatou galuega.

E i ai lava le talitonuga o le Nofoa, e leai e to'a atu foi i le paia o le Maota le tatou galuega. O le mea lea, se i tulai mai lau Afioga i le Taitai o le Itu Agai. Po o ua faamalieina lou finagalo?

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai e i ai le mea e fia faasao sa ou fia tulai atu ai.

**FOFOGA FETALAI:** Aua o lea ua sao lelei le taimi.

**Susuga Hon Tuilaepa Fatialofa Auelua Sailele Malielegaoi:** A o lea la ua maua lo'u avanoa a?

**FOFOGA FETALAI:** Ia.

**Susuga Hon Tuilaepa Fatialofa Auelua Sailele Malielegaoi:** Ou te momoli atu le faafetai i le avanoa lea. O le mea e fia faasao o tatou uma lava i totonu o le Maota leni e tatou te agaga i se mea lelei e leaga o aseta a le atunuu e tatou te naunau uma ia sao i faga. O le mea lea na ou tulai atu ai e fia faasao, o le saunoaga a lē sa Minisita muamua i i, i le Esetete Tausi. E fai faapefea leaga o la e faalogologo mai tagata, e faapefea na o le lima tagata faigaluega? E faasao atu e le lima ni tagata faigaluega, leaga o totonu iinei lea e alu atu ai faaupuga.

O lea foi ua aumai le faiga fou na o le tasi lava le faiga fou lea ou te tau faalogologo atu i ai. Sa amata foi lava ona mafaufau i ai i na taimi o le tuufaatasi o eleele i lalo o se Pulega. O lea foi la e le i faia, na o ni mafaufauga. O le tatalo, ia tau lau o le faamoemoe aua o lea lava tatou te autilo po o fea le faiga e sili atu ona lelei. Ae tatou te le iloa i le anoano o fuafuaga lelei tatou te faia ae oo ane i le taimi e faatino ai, e tele lava mea tatou te le iloa e ono tutupu ai.

**FOFOGA FETALAI:** Malo faafetai.

**Susuga Hon TUILAEPA FATIALOFA AUELUA SAILELE MALIELEGAOI:** Na o le pau a lena o le meafou. A o le tulaga lea i le

faamatuu atu o eleele e lisi e isi, e le o se faiga fou ua leva ona fai. Ua leva lava ona nonofo ai isi ma fai ai a latou atinae, e le o se faiga fou. E oo foi la i o i Niu Sila ma le tatou Ofisa la e i ai e le o se faiga fou foi, ua leva ona faatau le tatou fale lena e fuafua ai a tatou mataupu.

A ua malamalama i le saunoaga a lē sa tauavea le...

**FOFOGA FETALAI:** Faafetai.

**Susuga Hon TUILAIPA FATIALOFA AUELUA SAILELE MALIELEGAOI:** Ma o lea ou te tautino atu, e leai ma se mea e tasi na saunoa i ai le Minisita lea sa saunoa ou te talitonuina.

Ia manuia le tatou fonu.

**FOFOGA FETALAI:** Malo.

**Afioga Aliimalemanu Moti Momoemausu Alofa Tuuau:** Lau Afioga i le Fofoga Fetalai...

**FOFOGA FETALAI:** Ia se i tulai mai le Afioga i le Minisita leaga o lea ua pei ua maoti lava le fesili a le Taitai o le Itu Agai.

Se i tulai mai lau Afioga i le Minisita o Faatoaga.

**Susuga Hon Laauli Leuatea Polataivao Fosi:** Ia, e le teenia lou finagalo i le saunoaga a le sui usufono e le toe talitonu ia te au. O le maua lava lea va, e fa'i foi lona le talitonu mai ia te au, ae o le matua'i ou le toe talitonu i ai. E oo i lana faatofa ma lana talo ua ou le toe talitonu foi i ai.

Lau Afioga o le mea e fia faamalamalama, o le lima lea na ou taua, e tailima tagata i le poloka. E alu le lima tagata i le poloka koko, alu le lima tagata i le poloke vanilla, lima tagata i le poloka povi, e faapena. O la e faalogologo mai le Matagaluega. Tasha a o e faalogologo mai, e sao le mea lea ou te fai atu ai.

O le tatou Export Authority, mo le silafia e le Maota ua uma ona pasi e le Kapeneta, it's now run, la ua uma ona piki lana Board, Taitaifono ma le Komiti la ua fili le latou CEO fou ona aumai loa lea o le mea lea e atugalu i ai le Taitai o le Itu Agai.

Sefe le poloka vanilla lea, valaau le atunuu, o ai o le atunuu e i ai le tomai faapitoa o mea tau vanilla sau e fai mai lau offer i le poloka lea. O ai o le atunuu e i ai lona tomai i mea tau koko, sau e aumai lau offer i le 100 eka koko lea. O ai o le atunuu e lelei lana faipopo, sau i i. Ona aumai loa lea o aseta na ma tagata na o Commercial Farmers na e amata ai le tatou Export Authority lea e tau fai atu.

Ae pei ua ou manatu e faamalamalama faapena le uiga o le mea lea e taumafai. O lea ua fai le fofu e le Faigamalo.

**FOFOGA FETALAI:** Faafetai.

**Susuga Hon Laauli Leuatea Polataivao Fosi:** E pei ona ou fai atu, Talofa e i le Esetete Tausi, ia o ai na gau ai? O faaiuga lava na avatu iinei i le Maota lenei. Ave uma ai eleele, pule le Samoa Land ae valiano le Esetete Tausi, faatau uma e le Samoa Land ae maua tupe e le Samoa Land ae leai se tupe e ave e toe develop ai le Esetete Tausi. O le mea lena lea na tupu. Ui o lea, o lea ua tatou aoaoina Esetete Tausi is now fly on the Export Authority mo le lumanai, ina ia taunuu uma mea nei tatou te naunau i ai. Faamuamua faatoaga ona o le ivitu lea o le atunuu, lea ua tatou talitonu uma i le mea sa tatou ola mai ai. Ia, o le faamalamalama lena ma le faaloalo.

**FOFOGA FETALAI:** Malo faafetai, ia ou te talitonu foi ua manino lea tulaga, faafetai mo finagalo faaalua.

**Afioga Aliimalemanu Moti Momoemausu Alofa Tuuau:** Lau Afioga i le Fofoga Fetalai...

**FOFOGA FETALAI:** Ia, sa e lauga i le Lipoti lea?

**Afioga Aliimalemanu Moti Momoemausu Alofa Tuuau:** Lau Afioga pei o lou manatu lea na lagalaga ai finagalo o le Maota nei.

**FOFOGA FETALAI:** Oi ia lelei, ia faamalulu atu, ia se i saunoa lau Afioga i le sui usufono mamalu.

**Afioga Aliimalemanu Moti Momoemausu Alofa Tuuau:** Leai ua ou tulai e momoli atu lau faafetai i le lagalaga o finagalo i lenei taeao talu se manatu o le usugafono a Tina. Aua o le tulaga lava ia e pei ona saunoa nisi o sui usufono o agaga lava ia e avatu ai ni manatu o ni mea lelei. Po o fea foi le taga e alu i ai, e tasi lava le taga e alu atoa i ai mea uma nei o taga a le Malo. Pe tupe gau, pe tupe pau, pe tupe faasili, pe ua ova tupe faaalua nai lo tupe maua, o le mea lava e tasi.

Ae o le agaga na avatu ai se usugafono a Tina ua avea ai lou Sui o Tina i le latou Nofoa, ae faafetai ai lava i le Afioga i le Tamaitai Palemia. O le agaga na avatu e faatupu manatu, faatupu manatu po o le a le tatou fofu o le a fai. O lea e i i uma lava fanua, pei ona fai atu e le o se mea fou mea ia o tupe pau poo tupe gau po o a. Ae pei na faatepa lava i le Lipoti a le Suetusi e tau avatu ai se lagona.

Faafetai o lea ua maua le tali, o lea foi ua saunoa le Tamaitai Palemia o lea o le a i ai le isi fofu e foia ai le faafitauli lea, tatou o laia i luma e fai.

**FOFOGA FETALAI:** Malo faafetai.

**Afioga Aliimalemanu Moti Momoemausu Alofa Tuuau:** Po o le a le mea e oo i ai ae ia foia lea faafitauli sa tatou feagai ma i tatou. Manuia tele le fonu i lenei aso.

**FOFOGA FETALAI:** Malo, faafetai saunoa i le sui usufono mamalu. Faafetai foi o lea ua amanaia le saunoaga pau a le Tamaitai Palemia aua lava fuafuaga ma Faiga Faavae mo le agai i luma e foia ai le tatou Esetete Tausi.

Tulai mai lau Afioga i le Minisita pe i ai se mea e te fia saunoa ai, po o...Ia tulai mai lau Afioga i le Minisita.

**Afioga Hon TOEOLESULUSULU CEDRIC POSE SALESA SCHUSTER:** Faafetai lau Afioga i le Fofoga Fetalai, atonu ua maea ona talifuaitau le Afioga i le Tamaitai Palemia aemaise foi le Minisita o Faatoaga o lē sa Minisita o Esetete Tausi. E talitonu e leai se isi vaega o totoe ua malamalama uma foi i vaega o vanilla ia ma atinae o lo o i ai. Faafetai.

**FOFOGA FETALAI:** Ou te tapa lau Afioga i le Taitaifono mo le lafo. Tulai mai lau Afioga i le Taitaifono.

**Afioga NIUAVA ETI L. MALOLO:** Lau Afioga i le Fofoga Fetalai, ou te faatu le Lafo, *Ina ia faamaonia e le Fono Aoao le:*

1. *P.P. 2022/2023 Nu.110, Lipoti a le Komiti o le Vaega Tau le Tamaoaiga i le P.P. 2021/2022 Nu.20, Lipoti Faaletausaga a le Faalapotopotoga o Esetete Tausi a Samoa mo le Tausaga Faaletupe 2019/2020 ma le;*
2. *P.P.2022/2023 Nu.111, Lipoti a le Komiti o le Vaega Tau le Tamaoaiga i le P.P.2020/2021 Nu.79 ma le P.P.2021/2022 Nu.28, Lipoti Faaletausaga a le Faalapotopotoga o Eleele Tumaoti a Samoa mo Tausaga Faaletupe 2019/2020 ma le 2020/2021.*

*Faaluaina e le sui usufono mamalu mai Falealili 2 ma le sui usufono mo Gagaifomauga 2.*

*Na faamaonia le lafo.*

**FOFOGA FETALAI:** Ou te tapa lau Afioga i le Minisita mo le Lafo.

**Afioga Hon TOEOLESULUSULU CEDRIC POSE SALESA SCHUSTER:** Lau Afioga i le Fofoga Fetalai ou te faatu le Lafo; *Ina ia faamaonia e le Fono Aoao Tali a le Malo i Fautuaga a le Komiti o le Vaega Tau le Tamaoaiga.*

*Faaluaina e le Minisita mo Fesootaiga ma Faamatalaga Tekonolosi ma le Minisita mo Taaloga ma Alagaoa mo le Fiafia o Tagata.*

*Na faamaonia le lafo.*

**4. P.P. 2022/2023 NU.121, LIPOTI A LE KOMITI O LE VAEGA O ATINAE ESEESE I LE P.P. 2021/2022 NU.5, & P.P. 2021/2022 NU.31, LIPOTI FAALETAUSAGA A LE OFISA O LE PULE FAATONU MO TAUSAGA FAALETUPE 2019/2020 MA LE 2020/2021 - ILOILOGA**

**4.1. P.P. 2023/2024 NU.20, TALIA LE MALO I LE P.P. 2022/2023 NU.121, LIPOTI A LE KOMITI O LE VAEGA O ATINAE ESEESE I LE P.P. 2021/2022 NU.5, & P.P. 2021/2022 NU.31, LIPOTI FAALETAUSAGA A LE OFISA O LE PULE FAATONU MO TAUSAGA FAALETUPE 2019/2020 MA LE 2020/2021**

**5. P.P.2022/2023 NU.118, LIPOTI A LE KOMITI O LE VAEGA O ATINAE ESEESE I LE P.P. 2020/2021 NU.138, MA LE P.P.2021/2022 NU.32, LIPOTI FAALETAUSAGA A LE MATAGALUEGA O FESOOTAIIGA MA FAAMATALAGA TEKONOLOSI MO TAUSAGA FAALETUPE 2019/2020 MA LE 2020/2021 - ILOILOGA**

**5.1. P.P.2023/2024 NU.31, TALIA LE MALO I LE P.P.2022/2023 NU.118, LIPOTI A LE KOMITI O LE VAEGA O ATINAE ESEESE I LE P.P.2020/2021 NU.138, MA LE P.P.2021/2022 NU.32, LIPOTI FAALETAUSAGA A LE MATAGALUEGA O FESOOTAIIGA MA FAAMATALAGA TEKONOLOSI MO TAUSAGA FAALETUPE 2019/2020 MA LE 2020/2021.**

**FOFOGA FETALAI:** Tulai mai lau Afioga i le Taitaifono.

**Afioga FEPULEAI FAASAVALU FAIMATA SU'A:** Lau Afioga i le Fofoga Fetalai...

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai e fia fai nai a matou input i le... nai fesili laiti i le mataupu ia a o lea ua ou vaai atu o le a tapa le Taitaifono. O lona uiga ua leai foi se avanoa o matou.

**FOFOGA FETALAI:** Malie lau Afioga i le Taitai o le Itu Agai e le i oo atu i le taimi e fai ai a tatou felafolafoaiga. O le a se i tuu i luga le tatou Lipoti ia ona tuu atu foi lea o le avanoa. Aua e te popole.

Tulai mai lau Afioga i le Taitaifono.

**Afioga FEPULEAI FAASAVALU FAIMATA SU'A:** Faafetai mo le avanoa. Lau Afioga i le Fofoga Fetalai ou te faatu le lafo, *Ina ia faautagia e le Fono Aoao Lipoti e lua a le Komiti o le Vaega o Atinae Eseese o loo tuuina atu ai ana Sailiiliga, Fautuaga ma Iugafono.*

*Faaluaina e le sui usufono mamalu mai Vaisigano 1 ma le sui usufono mo Lefaga ma Faleaseela.*

**Afioga Hon TOELUPE MAOIAUTELE POUMULINUKU ONESEMO (Minisita mo Fesootaiga ma Faamatalaga Tekonolosi):** Lau Fofoga i le Fetalai ou te faatalofa i le Maota i lenei taeao.

Lau Afioga ou te faatu le lafo, *Ina ia faautagia e le Fono Aoao Tali a le Malo e faatatau i Fautuaga a le Komiti o le Vaega o Atinae Eseese.*

*Faaluaina e le Minisita mo Taaloga ma Alagaoa mo le Fiafia o Tagata, Minisita mo le Soifua Maloloina ma le sui usufono mo Falealupo.*

**6. P.P.2023/2024 NU.5, LIPOTI A LE KOMITI O TUPE MAUA MA TUPE TOTOGI I LE P.P.2022/2023 NU.142, LIPOTI FAALETAUSAGA A LE FALEMELI O SAMOA MO LE TAUSAGA FAALETUPE 2021/2022 - ILOILOGA**

**6.1. P.P.2023/2024 NU.75, TALI A LE MALO I LE P.P.2023/2024 NU.5, LIPOTI A LE KOMITI O TUPE MAUA MA TUPE TOTOGI I LE P.P.2022/2023 NU.142, LIPOTI FAALETAUSAGA A LE FALEMELI O SAMOA MO LE TAUSAGA FAALETUPE 2021/2022**

**FOFOGA FETALAI:** Tulai mai lau Afioga i le Taitaifono o le Komiti o Tupe Maua ma Tupe Totogi.

**Afioga FALEOMAVEGA TITIMAEA TAFUA (Taitaifono o le Komiti o Tupe Maua ma Tupe Totogi):** Lau Afioga i le Fofoga Fetalai ou te faatu le lafo, *Ina ia faautagia e le Fono Aoao le Lipoti a le Komiti o Tupe Maua ma Tupe Totogi o lo o tuuina atu ai ana Sailiiliga, Fautuaga ma Iugafono.*

*Faaluaina e le sui usufono mo Vaisigano 1 ma le sui usufono mo Lefaga ma Faleaseela*

**FOFOGA FETALAI:** Ou te tapa lau Afioga i le Minisita o Falemeli o Samoa.

**Afioga Hon TOELUPE MAOIAUTELE POUMULINUKU ONESEMO:** Lau Afioga i le Fofoga Fetalai ou te faatu le lafo, *Ina ia faautagia e le Fono Aoao Tali a le Malo e faatatau i Fautuaga a le Komiti o Tupe Maua ma Tupe Totogi.*

*Faaluaina e le Minisita mo Taaloga ma Alagaoa mo le Fiafia o Tagata ma le Minisita mo le Soifua Maloloina.*

*Na faamaonia le lafo.*

**FOFOGA FETALAI:** Ia, o lea ua maea faautagia e le Fono Aoa Lipoti a Tolu a Komiti faapea foi Tali a le Malo.

Ia o le avanoa leni o sui usufono mamalu. Lau Afioga i le Taitai o le Itu Agai, ia o lea ua oo mai le avanoa.

**Susuga Hon TUILAIPA FATIALOFA AUJUA SAILELE MALIELEGAOI:** Lau Afioga i le Fofoga Fetalai, e ese le taua o Lipoti nei, ma e le uma le fia lauga ai pea o leni foi itu ma avatu ai foi nai fautuaga mo le agai i luma o le tatou Malo.

O le Lipoti lea, o le a ou taaofai atua Lipoti ia o Fesootaiga Tau Tekonolosi faapea foi ma le Pule Faatonu. E le o toe na ma le laina le tulaga lea ua i ai le lalolagi, ua agai pisinisi i le itu lea o fesootaiga televavave. Ma o le taua o fesootaiga nei televavave lea na matua iloa le taua ina ua tulai mai faamai tetele nei o le Koviti. Na matua leai ai se fesootaiga e toe fai i le tulaga o ni fonotaga faava o Malo. Ae pau lava lea o le mea na mafai ai ona faaauau le fesootaiga a le lalolagi, o fesootaiga televavave ia faatekonolosi. O lona uiga o nisi atinae i le lumanai e i ai lava le talitonuga o le a tele ni mea fou e tutupu mai ai. Ma e le i manofonofu le tatou atunuu ina ua amata ona atinae le lalolagi ina ua faamatuu mai e Amerika le auupega lea o le internet e faatino ai taua e faaoga ai mea faatonutonu alumamao. O lea la na afua ai ona tatou liliu loa e aveese mai fesootaiga tau uaealesi mai le Postal and Telecommunication. Sa tasi le Matagaluega, Matagaluega o Falemeli ma Fesootaiga, lea la na tatou aveesea ai i le tausaga 2000 le tekonolosi lea o fesootaiga televavave ina ia tatou faaogaina loa faapisinisi, ina ia aua ne i telegese tatou ona agai lea i luma o le tele o atunuu ae agai tatou i tua.

I le taimi la leni ma le televave o le tatou atinae lea ua i ai, o le talitonuga lea ia te au ua maua le tulaga lea ua i ai Samoa, aemaise ina ua tatou faaulufale mai kamupani tetele ia fava o Malo, le Digicel ma le Vodafone, ona sa le i maua e tatou le tomai faatekonolosi o le faaogaina o auala faatelevavave. Lau Afioga i le Fofoga Fetalai, o lea la ou te tilotilo atu i Lipoti nei, e momoli atu ai lau faamalo i taumafaiga o lo o taumafai i ai le Minisita ma le Matagaluega i le taumafai lea ina ia faatelevave le faatupulaia pea ma le faaleleia atili o tatou fesootaiga. Ae tata lava ona faataugofie. O le mafuaaga foi lena lea ou te manatua na tatou taumafai ai e matala ni a tatou faitotoa se tolu e agai atu ai i fafo. Lea la e tau mai e le Lipoti lea, ua i ai a tatou lava uaealesi fesootai e alu atu i uaea i lalo le sami. Ua i ai le fesootaiga a le faa-regional o le Manatua Cable, a o lea foi e i ai le cable lea e fesootai ai tatou ma Amerika Samoa o lo o faaoga e le Vodafone. Ma o fesootaiga nei e tolu e faaopoopo atu i fesootaiga o le vateatea e tafilisaunoa ai tatou i le tulaga o le tau. O lea foi la ua aliali mai i le taimi nei, e taugofie atu le starlink i le tulaga lava lea o le faaoga o satellite. E taugofie mamao atu le starlink

a Niu Sila ma ou te talitonu e i ai tagata ia ua latou faatau maia na o le \$200 le unit Niu Sila. A o lea foi la ua faasa e tatou, aua o le mea lena e tatau ona faasa. E tatau ona tatou faasaina mea ia ae faatau le tatou pisinisi ina ia taulia ai. A o le a la le mea lea ua tupu? Ua fai lava sina taugata tele o totogi o fesootaiga nei e alu atu i lalo o le sami. Ona tupu ae ai lea o le fesili, aisea le mea e faataugata ai a o lea e fai le competition? O lau fesili e ave tonu lava i le Regulator? O le a le tou mea o fai? O mea ia e tatau ona outou vaavaai i ai, ia faataugofie tatou fesootaiga ia e alu atu i lalo, le tatou lava gateway i fafo ae le o le maumau o tatou tupe e o ai i luga. Ia ma le isi itu faigata lena, e faigata ona tatou pulea content aua a tatou fanau. Lau Afioga i le Fofoga Fetalai, o le mataupu muamua lena.

Ou te faafetaia le Digicel faapea foi ma le Vodafone i le Lipoti lea e aumai lea e tau mai ai e 200... ua lata i le 200 pou faasalalau a nei kamupani ua maea ona faatinoina i nei galuega tetele, ua mautinoa ai le ooo atu o auaunaga tau fesootaiga i le toatele o le mamalu o le atunuu.

O le taua lau Afioga o le faaupuga lea, e aveese ai le mafauauga lea na i ai, faitio lava i le aumai o le Vodafone fai mai sa le tatau ona alu ai ma le tatou infrastructure. A o lea la ua tau mai, e sili atu ona tele a latou tupe na omai faaalu i le faaleleia atili o le tatou fesootaiga televavave. Ma o lau fautuaga i le Minisita ma le aufaigaluega, se i toe tilotilo lava i le itu lea, ua fai lava si taugata tele o a tatou fesootaiga. O le ala foi lena lele ua o ai isi faatau mai a latou starlink mai Niu Sila ona e taugofie. E tatau ona tatou taumafai e faataugofie atu tatou nai lo le vaega lena.

O le itu taua lena mo le faatauliaina o tatou lava pisinisi. Ma o se luitau foi lena ou te tuuina atu i le Minisita faapea ma le Regulator, ia faapea foi ma le Matagaluega. E oo foi la i le tulaga o le mea lea ua...

**FOFOGA FETALAI:** Ua ou vaelupeina le saunoaga a lau Afioga i le Taitai o le Itu Agai ua manaia foi le saunoaga ma ua oo foi i nisi itu taua.

Talu ai ona o lea ua tatou paia le tatou taimi malolo, o le mea lea e faaauau le saunoaga pe a tatou toe taliu mai i le aso a taeao, e le o toe tele foi se taimi o lau Afioga i le Taitai o le Itu Agai.

E momoli atu le faamalo ma le faafetai i le paia o le Palemene i le taumafaiga o le tatou galuega i lenei aso, e faafetai atu i sui usufono mamalu sa sausaunoa aemaise foi e le faigofie le galuega sa feagai ma Afioga i Taitaifono ma Afioga i Minisita i le tau faamanino o mataupu sa laga i saunoaga o lenei aso. Faamalo faafetai.

O lea ua tatou taunuu mai i le tatou taimi manava ae o le a maua avanoa i le aso fono a taeao e faaauau ai saunoaga i a tatou galuega ua faatulaga i le Pepa o Galuega. E toe faamanatu atu pea o le tatou fono lenei ua faamamafa lava i avanoa e tagofia ai Lipoti a Komiti Faa-Palemene ma tali a le Malo. E le toe tau faamatalaina o Lipoti Faaletausaga, o Lipoti manino ia o galuega faatino a le Pulega Faatonu o lo o lipoti mai i le Palemene mo le atoaga o le faatinoga o lana matafaioi mataitu. A o le agaga fiafia, toetiiti lava sui usufono mamalu e le o auai ona o gasegase



ma tuatuagia le maalofia e pei ona faaoo mai ai a latou faanoi, a o le toatele o le tatou Maota o lo o auai uma i tatou iloiloga. O le mea lea faamalo faafetai.

E faafetai atu i le tapuaiga a Ofisa Sili o Pulega o Matagaluega ma Faalapotopotoga a le tatou Malo le faatoatoa aua le lagolagoina o taualumaga a le Palemene.

Faafetai Samoa i lau tapuaiga i lenei aso ua sao ma uli le alofaiva o lau Palemene ona o lau tatalo ma lau tapuaiga malo faafetai. Ia alofagia e le Atua le feagai ai o si o tatou atunuu ma toega o feau ma tiute o lenei aso.

Ae tatou te le i tolopo e talosaga atu i le Afioga i le sui usufono mamalu mo Salega 1 e saunia se tatou tatalo e faaiu ai le tatou fono.

***Na tolopo Taualumaga a le Fono Aoao Faitulafono i le itula e 1:08 i le aoauli seia aulia le Aso Lulu, 13 o Mati 2024 i le itula e 9.30 i le taeao.***